

Siunnersuummut nassuiaatit

Nassuiaatit nalinginnaasut

1. Aallarniut

Aatsitassarsiornermut atatillugu uranimik misissueqqaarnerit, ujaasinerit piiaanerillu inerteqqutiginiisaat siunnersuutip matuma siunertaraa.

Ulloq 1. januaari 2010 aatsitassanut suliassaqarfimmut akisussaaffik Namminersorlutik Oqartussat akisussaaffigilerlugu tiguaat. Aatsitassanut suliassaqarfiup akisussaaffigilerlugu tiguneqarneranut peqatigitillugu aatsitassat pillugit ingerlatallu tamatumunnga pingaarutillit pillugit Inatsisartut inatsisaat nr. 7, 7. december 2009-imeersoq (Aatsitassanut ikummatissanullu inatsit) atuutilerpoq. Naapertuuttumik aatsitassanik piiaanissamik aamma nunap iluanik atuinissamik qularnaarinissaq siunertaralugu aatsitassanut ikummatissanullu inatsit akuerineqarpoq. 2010-mi atuutilertermi kingornatigut aatsitassanut ikummatissanullu inatsit aatsitassanik suliassaqarfimmi, aatsitassanik suliffissuaqarfimmi inuiaqatigiinnilu allanngoriartornerit malillugit Inatsisartut inatsisaat nutarsaallunilu naleqqussaanissaq siunertaralugu arlaleriarluni allanngortinneqartarsimavoq.

Aatsitassanut ikummatissanullu inatsit aatsitassarsiornermut aatsitassanillu piiaanermut tunngasutut pissutsinik tamanik inatsisilersuivoq. Pissutsit inatsisilersuiffigisat ilaanniippat ilaatigut aatsitassarsiornermik sularisat avatangiisinullu pissutsit. Taamaattorli misissueqqaarnermut, ujaasinerit piiaanernullu suliaqarnermut akuersissummik pissarsiffigisassatut aatsitassat sorliussaneri aatsitassanut ikummatissanullu inatsimmi inatsisilersugaanngillat. Taamaattumik tunngaviatigut aatsitassanik sunilluunniit ilaqartunik aatsitassarsiornermi suliaqartoqarsinnaavoq, tassalu aatsitassanut ikummatissanullu inatsimmi aalajangersakkanut naapertuuttunut tamatumunnga akuersissummik pissarsisoqassappat.

2013-imi oktobarimi attueqqusinngilluinnarnissamik politikkitut taaneqartumik Inatsisartut atorunnaarsitsinerisa kingornatigut aatsitassarsiornermi, pinngoqqaatinik radioaktiviusunik ilaqartunik, ilanngullugu uranimik akuersissutip pissarsiarinissaa tunngaviatiguttaaq periarfissaalersimavoq. Taamaattoq akuersissutit taamaattut pisuni tamaginni atugassarititaasut immikkut ittut tunngavigalugit tunniunneqartarput, akuersissutit 2013-imi oktobarimi akuersaanngilluinnarnissamik politikkeqarnerup atorunnaarsinneqarnerata siornatigut imaluunniit kingorna tunniunneqarsimanersut apeqqutaatinngagu.

Ukiorpasuarni, ingammillu attueqqusinngilluinnarnissamik politikkip atorunnaarsinnerata kingornatigut urani tassaasimavoq sammisaq annertuumik kikkunnit tamanik sianigineqarsimasoq. Uranimut attuumassutilinnik aatsitassarsiornermi suliniutinut siamasissumik, inuinnarnit akerliusoqartoq takuneqarsinnaasimavoq. Tamatumunnga patsisaapput ingammik aarleqqutit immikkut ittut, uranimik ilaqartunik aatsitassarsiornermut attuumassutillit. Inuinnaat akerliunerat taanna kingullermik 2021-mi aprilimi Inatsisartunut

qinersinermut atatillugu, tassungalu atatillugu isummanik uuttortaasoqarnerani takuneqarsinnaasimavoq. Taamaattorli taamaalisukkut tamanna uranimik ilaqartuunngitsunik aatsitassarsiornerup ingerlattuarnissaanut innuttaasut tapersersuinerminnik oqaaseqarsimapput.

Nunap iluanik aammalu aatsitassatut isumalluutunik taakkuninnga Namminersorlutik Oqartussat piginnittussaataapput, taamaattumillu aatsitassat isumalluutit qanoq pitsaanerpaamik iluaqutiginnissaanut innuttaasut aalajangiisussaasariaqarput. Tamatuminnga tunngaveqartumik uranimut attueqqusinnigilluinnarnissamik politikkip Inatsisartut inatsisaatigut atuutsinneqalernissaa siunertaralugu siunnersuummik matuminnga aatsitassanut ikummatissanullu inatsisip ilassuteqarfiginnissaa Naalakkersuisut kissaatigaat. Kalaallit Nunaanni uranimik paaasoqannginnissaa imaluunniit uranimik Kalaallit Nunaanni piiarneqartumik tuniniaasoqannginnissaa pillugu Naalakkersuisut tunngavigisassatut aalajangiussinerannik siunnersuut piviusunngortitsissaaq.

2. Inatsisit atuuttut

Ullumikkut Kalaallit Nunaanni uranimik misissueqqaarnermut, ujaasinermut aamma paaanermut inatsisaasuni inatsilersugaasumik inerteqqutissamik peqanngilaq. Taamaattorli aatsitassanut ikummatissanullu inatsimmi kapitali 8 najoqqutaralugu annikitsumik aatsitassarsiornermik suliaqarnermut aatsitassanik radioaktiviunuk ujaasilluniluunniit paaanermut akuersissummik nalunaaruteqartoqarsinnaanngilaq, takuuk aatsitassanut ikummatissanullu inatsimmi § 33, imm. 1, 2. pkt. Aammattaq aatsitassanut ikummatissanullu inatsimmi kapitali 11 najoqqutaralugu aatsitassanut ikummatissanullu inatsimmi §§ 45 aamma 45 a malillugit akuersissuteqarani katersuisinnaanerup paaasinnaanerullu aatsitassanik radioaktiviunuk ilaqartitaannginnera atuuppoq, takuuk aatsitassanut ikummatissanullu inatsimmi § 45 c.

Aatsitassanik suliaasaqarfiup tiguneqarnerata kingornatigut, aammalu 2013-p tungaanut Namminersorlutik Oqartussat aatsitassanik suliaasaqarfik imatut aqutarisimavaat tamatigoortumik pinngoqqaatinut radioaktiviunut, ilanngullugu uranimut tunngatitanik aatsitassarsiornermik suliaqartoqarsimanani. Tamanna pillugu ataani imm. 2.1-imi annermik paasiniaagit.

Pinngoqqaatinik radioaktiviunuk, ilanngullugu uranimik ujaasinissamut pisinnaatitsissutinik piginnittut ikittuaraannaat akuersissutinik pissarsisimapput, taakkununnali ujaasinissamut akuersissummi immikkut ittutut atugassarisat aamma akuersissutaasimapput. Kalaallit Nunaanni maannakkut uranimik iluaquteqartoqanngilaq, naak aatsitassanut ikummatissanullu inatsit atuuttoq malillugu tunngaviatigut uranimik misissueqqaarnermut, ujaasinermut aamma iluaquteqarnermut akuersissutinik nalunaaruteqartoqarsinnaagaluartoq. Tamanna pillugu ataani imm. 2.2-mi annermik paasiniaagit.

Aamma inatsisit allat malillugit siunnersuut manna arlaannaannulluunniit pisussaaffigisanik il.il. pinngitsuutitsisuunera oqaatigineqassaaq. Taamaalillutik siunnersuummut matumunnga ilaasutut aatsitassarsiornermi suliarisat ilaatigut aatsitassanut ikummatissanullu inatsimmik qinngornerit ioninngortitsisartut pillugit aamma qinngornernut illersuuteqarnissaaq pillugu Inatsisartut inatsisaat nr. 33, 9. december 2015-imeersumik naapertuutsitsillutik pissapput.

2.1. Attueqqusinnngilluinnarnermut politikkip atorunnaarsinnera”UKA13-imit atuutilersumik uranimik aatsitassanillu qinngornilinnik piiasarnermik attueqqusinnngilluinnarnerup atorunnaarsinnissaannik Inatsisartut akuersissuteqarnissaannik Inatsisartut aalajangiussinissaannut siunnersuut”-mik Inatsisartut ulloq 23. oktobari 2013-imi aappassaanerinerisigut attueqqusinnngilluinnarnermik politikki atorunnaarsinneqarpoq.

Ulloq 21. oktobari 2013-imi siunnersuummik Inatsisartut aappassaanerinerinut Aatsitassanut Ataatsimiititaliaq isumaliutissiissuteqarpoq. Isumaliutissiissummi imm. 1.1-imi takuneqarsinnaavoq tunngaviusumik aalajangiiffigisassaaq pisortatigoortumik kingunerissagaa *”ujaasinermit piiaanermullu atatillugu aatsitassanut qinngornilinnut Kalaallit Nunaata killeqartitsiunnaarnera.”*

Ulloq 8. oktobari 2013-imi Inatsisartunut saqqummiussissutitut allakkiaqqaamut atatillugu attueqqusinnngilluinnarnermut politikkimut tunngavigisaaq pillugu makku takuneqarsinnaapput:

”Atortussiassanik aatsitassanik tamatumunngalu pingaaruteqartutut sulianut suliassaqarfik Namminersorlutik Oqartussat 2009-mi tiguaat. 2009-mi Namminersornerup atuutilernerata kingornatigut suliassaqarfik taanna takussutissaavissortutut Namminersorlutik Oqartussaniilerpoq. Aatsitassaqarfiusumiippat aatsitassat suut tamarmik, aatsitassanimmi radiop qinngorneqanngitsunik piiaanermut naleqqiullugu aatsitassat radiop qinngornillit piiarneqarnissaat inatsisitigut tunngasutigut tunngavigisami immikkoortitsivigineqanngillat.

Oqaluttuarisaanikkut tunngaveqartumik uranimik aatsitassanillu radiop qinngornilinnik allanik piiaanissamut ”attueqqusinnngilluinnarnerup” eqqunneqarnissaa pillugu politikikkut aalajangiisoqarpoq. Aatsitassarsiornerissamut akuersissutini tamani ingerlatseqatigiiffiit aatsitassanik tamanik, taamaallaat aatsitassat radiop qinngornillit pinnagit, ujartuisinnaanerannik allassimasoqassasoq attueqqusinnngilluinnarnerup nassatarisimavaa.”

Inatsisartut aalajangiiffigisassaattut siunnersuummik suliaqarnerat sioqqullugu qulaani pineqartutut isumaliutissiissummiik ataatsimiititaliap saqqummiunnissaanut atugassanik Aatsitassanut Ataatsimiititaliamit apeqqutit arlallit taamanikkut Inuussutissarsiornermut Aatsitassanullu Naalakkersuisup ulloq 16. oktobari 2013-imi akissuteqarfigai. Taamanikkut Naalakkersuisup ilaatigut akissutigaa attueqqusinnngilluinnarnermik politikki ujaasillunilu piiaanermut suliaqarnermut, tamakkununngalu akuersissutinut atuuttoq, pineqarlutik aatsitassat pileqqaarfimmittut annertussutsit qaangerlugit akuutissanik radioaktiviusunik

imaqartuusut. Tassunga atatillugu qaqqat ujaraannut granitinut uranip pileqqaarfigisatut imarisaata nalinginnaasumik 0,0004-0,006 pct.-it akornanniikkajunnera Naalakkersuisup ilisimatitsissutigaa. Ilaatigut aatsitassanik qaqtigoortunik piiaanissamut periarfissaasumik ilaqartillugu attueqqusinnngilluinnarnermut politikkip atorunnaarsinnissaa pillugu kissaatigisaqarneq Naalakkersuisup tunngaviliiffigaa.

Attueqqusinnngilluinnarnermik politikkip akuersissuteqarneq imaluunniit atorunnaarsitsineq pinngoqqaatinik radioaktivusunik, imaluunniit pileqqaarfigisatut naleqassutsit qulaannik imaluunniit ataannik imalinnik aatsitassanik allanik pinngoqqaatinik radioaktivusunik misissueqqaarnermut, ujaasinermut imaluunniit piiaanermut malittarisassianik allassimasanik tunngavissiiimapput, annikitsumik aatsitassarsiorluni suliaqarnermut, aamma aatsitassanut ikummatissanullu inatsimmi § 33, imm. 1, 2. pkt., aamma § 45 c malillugit akuersissummik peqarani katersuillunilu piiaanermut tunngasutut inerteqqutit taamaallaat eqqaassanngikkaanni.

Attueqqusinnngilluinnarnermut politikki ilaatigut imatut atuutsinneqarsimavoq aatsitassanik misissueqqaarnermut ujaasinernullu piviusutut akuersissutini aatsitassanut ikummatissanullu inatsit malillugu misissueqqaarnermut ujaasinernullu akuersissutinut akuerisatut najoqqutassatut atugassarisanik takuneqarsinnaasunik aatsitassat ilaasimallutik. Najoqqutassatut atugassarisat ilaatinngilaat pinngoqqaatit radioaktivusut.

2013-imi oktobarimi attueqqusinnngilluinnarnermik politikkip atorunnaarsinnerata kingornatigut aatsitassanut ikummatissanullu inatsimmi akuersissutinut najoqqutassatut atugassarisanik royaltynik akiliuteqartarnerit pillugit aalajangersakkat eqqaassanngikkaanni allannguuteqartoqarsimanngilaq. Taamaalilluni pinngoqqaatinut radioaktivusunut, ilanngullugu uranimut sammitinneqartunik aatsitassarsiornermi suliarisanut suli tamatigoortumik akuersissutinik tunniussisoqartoqanngilaq. Taamaattorli 2013-imi oktobarimi Inatsisartuni attueqqusinnngilluinnarnermut politikkip atorunnaarsinnera sioqqutitsiarlugu kingornatigullu aatsitassanut ikummatissanullu inatsit malillugu ujaasinissamut akuersissutit piviusut aalajangersimasut pinngoqqaatinik radioaktivusunik, ilanngullugu uranimik immikkut ittumik atugassaqaartitaqarfiusunik ilaqarsimapput.

2.2. Aatsitassanut ikummatissanullu inatsit

Uranimik misissueqqaarnermut, ujaasinermut piiaanermullu tunngatillugu aatsitassanut ikummatissanullu inatsimmik atuuttumik ilasinissamik siunnersuut manna siunertaqarpoq.

Aatsitassanik tulluurtumik piiaanissaq, aamma nunap iluanik atugaqarnermik qularnaarinissaq siunertarlugu aatsitassanut ikummatissanullu inatsit akuersissutigineqarpoq. Aammattaaq isumannaallisaanermut, peqqinnissamut, avatangiisinut, isumalluutinik iluaquteqarnermut aamma inuiaqatigiinnut tunngasumik piujuartitsinermit tunngatillugu aatsitassanik suliarisat tulluurtumik, kiisalu isumannaatsumik pinissaasa qularnaarnissaat aatsitassanut ikummatissanullu inatsimmi siunertaavoq.

Aatsitassanut ikummatissanullu inatsit aatsitassarsiornernut aatsitassanillu piiaanermut tunngasutut pissutsinik tamanik inatsisilersuivoq. Pissutsit inatsisilersuiffigisat ilaanniipput ilaatigut aatsitassarsiornermik suliarisat avatangiisinullu pissutsit. Taamaattorli misissueqqaarnernut, ujaasinerit piiaanernullu suliaqarnermut akuersissummik pissarsiffigisassatut aatsitassat sorliussaneri aatsitassanut ikummatissanullu inatsimmi inatsisilersugaanngillat, aatsitassanut ikummatissanullu inatsimmi § 33, imm. 1, 2. pkt. aamma § 45 c malillugit akuersissummik peqarani annikitsumik aatsitassarsiornernut aamma katersuillunilu piiaanermut naleqqiullugit inerteqqaataasut taamaallaat eqqaassanngikkaanni. Taamaattumik – aalajangersakkat taakku suliaqarfigisaasa avataanni – tunngaviatigut aatsitassanik sunilluunniit ilaqartunik misissueqqaarnerit, ujaasinerit aamma piiaanerit suliarineqarsinnaapput, tassalu aatsitassanut ikummatissanullu inatsimmi aalajangersakkanut naapertuuttunut tamatumunnga akuersissummik pissarsisoqassappat.

Aatsitassanut ikummatissanullu inatsimmi tamatumunnga malittarisassiat erseqqinnerisut tamakku malillugit Naalackersuisunit nalunaarutigisatut akuersissut najoqqutaralugu aatsitassanik misissueqqaarnerit, ujaasinerit piiaanerillu taamaallaat pisinnaapput.

Aatsitassanut tunngasutut misissueqqaarnermut akuersissutini nalinginnarmik ilaasarput aallarniutitut, sumiissusersuisutut misissuinerit killilimmik annertussuseqartut, aallaaviatigullu ukiuni tallimani pisinnaatillugit tunniunneqartarput.

Aatsitassanik ujaasinerit akuersissutit aallaaviatigut ukiut qulit tikillugit pisinnaatillugit nalunaarutigineqartarput, nalinginnarmillu annikitsortaligaanerusunik misissuinerit tunngasuusarput, soorlu geologiskimik, geokemiskimik geofysiskimillu misissuinerit aamma qillerinerit, kiisalu sulluliarsuarnik sullornillu iserianik sanaartorerit.

Ujaasinerit piiaanermullu akuersissutit piviusutigut immikkoortillugit nalunaarutigineqartarput. Aatsitassanik iluaquteqarnermut akuersissut kisermaassisinnaatitaaffilikkatut nalunaarutigineqartarpoq, annikitsumik aatsitassarsiorneri pillugit aatsitassanut ikummatissanullu inatsimmi immikkut ittutut malittarisassianik taakkuninnga suliniutit pineqanngikkaangata. Iluaquteqarnissamut suliaqarnerit aatsitassanut ikummatissanullu inatsimmi erseqqinnerusumik nassuiarneqanngillat, ujaasillunilu iluaquteqarnermik suliaqarneriipput akuersissut malillugu pisinnaatitsissummik piginnittumit imaluunniit taanna sinnerlugu suliarisat tamarmik, ilaallutik pisarialittut attaveqarfiit, aammalu ujaasillunilu iluaquteqarnermut suliaqarnermut tapersersuutitut suliarisat pilersinneqarneri.

Aatsitassanut ikummatissanullu inatsimmi kapitali 8 najoqqutaralugu annikitsumik aatsitassarsiornerni aatsitassanik radioaktiviuserit ujaasinerit imaluunniit piiaanermut akuersissummik nalunaaruteqartoqarsinnaanngilaq, takuuk aatsitassanut ikummatissanullu inatsimmi § 33, imm. 1, 2. pkt. Aamma annikitsumik aatsitassarsiornermik suliniutinut

misissueqqaarnernut akuersissutinik nalunaaruteqartoqarsinnaanngilaq. Ilanngullugulu aatsitassanut ikummatissanullu inatsimmi kapitali 11 najoqqutaralugu aatsitassanik radioaktiviunuk katersuillunilu piiaanermut attaveqarneq ilaasuunngitsoq atuuppoq, takuuk aatsitassanut ikummatissanullu inatsimmi § 45 c.

Taamaalilluni annikitsumik aatsitassarsiornermut, aammalu akuersissummik pigisaqarani aatsitassanik katersuillunilu piiaanernut tunngatillugit urani aatsitassanut ikummatissanullu inatsimmi inatsisilersugaareerpoq. Taamaattumik aatsitassanut ikummatissanullu inatsimmi § 2, imm. 2, nr. 1 malillugu aatsitassarsiornermut suliassaqarfimmi, akuersissutinik pisariaqartit-sisuni taamaallaat aatsitassanut ikummatissanullu inatsimmut atuuttumut siunnersuut manna ilassuteqartuuvoq.

2.3. Naalagaaffeqatigiinnermut aamma namminersornermut aqqissuussinnermut tunngasut Siunnersuut aatsitassarsiorluni ingerlataqarnermut tunngassuteqarpoq. Maannakkut aatsitassanut ikummatissanullu inatsisip atuutileraneranut peqatigitillugu aatsitassanut suliassaqarfik Namminersorlutik Oqartussanit akisussaaffigilerlugu tiguneqarpoq, taamaalillutillu Namminersorlutik Oqartussat aatsitassanut suliassaqarfimmi aqutsisinnaapput, ingerlatsisinnaapput ineriartortitseqqissinnaallutillu. Tamanna aamma maleruagassiinnermut siunnersuummi matumani ilaatinneqartumut atuuppoq.

2013-imi oktobarimi akuersaanngilluinnarnissamik politikkeqarnerup atorunnaarsinneqarnissaa eqqarsaatigineqartoq sioqqullugu danskit naalackersuisui suleqatigiissitaliamik danskit kalaallillu oqartussaasunit peqataaffigineqartumik pilersitsipput. Suleqatigiissitaliamik pilersitsinnermut siunertaavoq, akuersaanngilluinnarnissamik politikkeqarnerup atorunnaarsinneqarnerani Kalaallit Nunaanniit uranimik piiaanerup avammullu annissuinerup sunniutissaannik qulaajaanissaq.

Suleqatigiissitaliaq inerniliivoq, uranimik piiaanissamut avammullu annissuinnissamut nunami namminermi annertuumik maleruagassiinnissaq inerisaanissarlu, allaffissornikkut periaatsit pisariaqartunik immikkut ilisimasalinnik sulisoqarfiusut pisariaqartut, nunani tamalaani pisussaaffiit, inassuteqaatit aamma nunani allani misilittakkat tunngavigalugit oqaatigineqarsinnaasoq. Aammattaaq suleqatigiissitaliaq inerniliivoq, Naalackersuisut nunanut allanut politikikkut piginnaatitaaffiunik inatsisitigut nalilersuinnermut tunngasut, danskit kalaallillu oqartussaasuisa isumaqatigiinnngissutigigaat, taamaattumik akuersaanngilluinnarnissamut politikkeqarnerup atorunnaarsinneqarneranut atatillugu Kalaallit Nunaata Naalagaaffeqatigiinnerup ataatsimoortumik soqutigisaannut naapertuuttumik iliuuseqarnissaata qulakkeernissaanut Danmarkip aamma Kalaallit Nunaata akornanni suleqatigiinnissamut isumaqatigiissusiortoqassasoq suleqatigiissitaliap inassutigaa. Suleqatigiissitaliaq aamma isumaqarpoq atomip nukinganut isumannaallisaanermut, qinngornernut illersuinnermut il.il. tunngatillugu Danmarkip aamma Kalaallit Nunaata akornanni aalajangiisinnaatitaaffiit qanoq agguagaanersut paasinarsinneqanngitsoq,

taamaattumik suleqatigiissitaliap aamma immikkoortuni taakkunani Danmarkip aamma Kalaallit Nunaata akornanni suleqatigiinnissamut isumaqatigiissusiornissaq inassutigaa.

2016-imi januaarimi Naalakkersuisut aamma danskit naalakkersuisui isumaqatigiissutitut ataatsimoortumik isumaqatigiissuteqarput, Danmarkip aamma Kalaallit Nunaata uranimik piiaanermut avammullu annissuinnermut tunngatillugu siunissami suleqatigiinnissaannut aamma aalajangiisinnaatitaaffiit agguagaanerrannut killissaliussanik erseqqinnerusunik aalajangersaaviusunik.

Ilaatigut isumaqatigiissutiniippoq Kalaallit Nunaanni uranimik piiaanissamut avammullu annissuinnissamut tunngatillugu nunanut allanut, illersornissamut sillimaniarnermullu politikkimut tunngasut pillugit pingaarnertigut suleqatigiinnissamut isumaqatigiissut. Danmarkimi tamanna tunngavigalugu EU-mi maleruagassiineq aallaavigalugu sillimaniarnermik nakkutiginninnissamut aamma avammut annissuinnermut nakkutiginninnissamut pisussaaffiit pillugit maleruagassat akuerineqarput.

Aammattaaq isumaqatigiissutiniippoq aatsitassarsiorfimmik ingerlatsinnermut atatillugu atomip nukinganut sillimaniarnermut Kalaallit Nunaata isumaginninnissaa pillugu isumaqatigiissut. Isumaqatigiissummi tassani allassimavoq atomip nukinganit nukissiorfinnut inatsit aamma atomip nukinganit nukissiorfinni il.il. sillimaniarnermut avatangiisinullu tunngasut pillugit inatsit naapertorlugit Namminersorlutik Oqartussat atomip nukinganut sillimaniarnermut suliassaqarfimmut aalajangiisinnaatitaasut. Isumaqatigiissummi ilaatinneqarpoq aatsitassarsiorfimmik ingerlatsinnermut tamatumunngalu atasumik uranimik aamma thorium-imik suliareqqiinnermut atatillugu atomip nukinganit nukissiorfinnik sanaartornissamut ingerlatsinnissamullu akuersissuteqartarneq nakkutilliinerlu.

Uranimik piiaanermut il.il. tunngatillugu inatsimmik killilersuinerusumik atuutsitsilernissaq, siunnersuummi matumani aalajangersakkani ataatsimut isigalugu siunertaavoq. Taamaattumik siunnersuut isumaqatigiissutitut matuma siuliani allassimasunut imaluunniit maleruagassanut imaluunniit Naalagaaffeqatigiinnermi allatigut soqutigisanut tunngatillugu isumanerluuteqarnissamut siunnersuut pissutissaqalersitsinngitsoq, Aatsitassanut Naalakkersuisoqarfik naliliivoq.

3. Inatsisissatut siunnersuutip imarisai

3.1. Uranimik misissueqqaarnermut, ujaasinnermut piiaanermullu inerteqqut

Uranimik misissueqqaarnerup, ujaasinerup aamma piiaanerup inerteqqutigineri siunnersuutip nassatarai.

Urani avatangiisini eqqaanniittuni siaruarsinnaavoq, aammalu uranip taamatut anianera avatangiisinut ajornartorsiorfitsisumik sunniisinnaavoq. Aatsitassarsiorluni ingerlatassani uranimut siunnerfeqartinneqartuni taamatuttaaq tunisassiornermut atatillugu uranimik aarlerinaatilmik aniatitsisoqarsinnaavoq, assersuutigalugu assartuinnermut atatillugu,

suliarinninnermeersup erngup kuutsittoorneqarnerani il.il. ”yellow cake”-nik kuutsitsisoornermi. Ingerlatassanik uranimut siunnerfeqartinneqartunik inerteqquteqarnermi aarlerinaataasut taakkua arlallit aarlerinarunnaarsinneqassapput.

Taamaattorli uraniunngitsumut aatsitassarsiornerit akuerineqassapput isumalluut uranimik annikitsuaraarsuarmik annertussusilimmik imaqassappat. Killilersuummut tassunga tunngavigisaq tassaavoq aatsitassarsiornerit arlallit inerteqqutiginnissaannik siunertaqarfiunngitsut piviusunngortinnissaannut nalinginnaasumik pileqqaarfigisatut qinngornerit ajornakusoortitsissanerat imaluunniit pisinnaatitsissannginnerat.

Oqimaassutsimik 100 ppm-imik (parts per millionimik) 0,01 pct.-imut assingusumik tunngaveqartitamik uranimut naleqassutsip killingisassaa aalajangerneqassasoq siunnersuutigineqarpoq. Naleqassutsip killigisaa taanna 2009-mi assingusumik uranisiornissamut inerteqqummik eqqussisoqarfiusumi Canadami Nova Scotiami atuuttumut assinguvoq.

Naleqassutsini killingisaa aamma uranimut pileqqaarfigisatut naleqassutsit qaqqap ujaraanit imaluunniit qaqqat ujaraannit aalajangerneqartarneranik tunngaveqartumik, taamaattumillu Kalaallit Nunaanni assut assigiinngiiaartuusumik aalajangerneqarpoq. Qaqqat ujaraannut granitiskinut pileqqaarfigisatut naleqassuseq (tassa imaappoq pinngortitamiittartut annertussusaat) nalinginnaasumik 4-60 ppm-mik oqimaassuseqartarpoq. Taamaalluni uranimut pileqqaarfigisatut naleqassuseq 100 ppm inorlugu oqimaassuseqartoq naliliisoqarpoq. 100 ppm-imik oqimaassuseqarnerani akuerisatut naleqassutsit killissaannik aalajangiinikkut siunnersuutip matuma uranimut pileqqaarfigisatut naleqassutsinik qaangiisuunatik imaqartunik suliniutit piviusunngortissinnaanerannut killilersuisuussannginnera qularnaarneqarpoq. Taamaaliornermi aamma suliassat akuersaanngilluinnarnissamik politikkeqarnerup siusinnerusukkut atuuttup nalaani piviusunngortinneqarsinnaasimasut piviusunngortinnissaannut periarfissat, siunnersuummi matumani killilerneqannginnissaat qulakkeerneqarpoq. Paarlattuanik naliliisoqarpoq 100 ppm-imik oqimaassusilinnut naliusunut killissaliineq inatsisip siunertaata qulakkeernissaanut naleqquttumik appasisuusooq.

3.2. Pinngoqqaatit radioaktiviusut allat

Pinngoqqaatinik radioaktiviusunik allanik misissueqqaarnermut, ujaasinermit piiaanermullu inerteqqummik eqqussisoqanngilaq, pinngoqqaatinulli radioaktiviusunut allanut inerteqqummik Naalakkersuisut atuutsitsilersinnaanerannut periarfissiisoqarpoq. Pinngoqqaatinut radioaktiviusunut allanut inerteqqut atuutsinneqalissappat taakkununnga naleqassutsit killingisassaannik Naalakkersuisut aamma aalajangiisinnaapput.

Peqatigisaanik thorium-inut inerteqquteqarsinnaanerup atuutsinneqalernissaa aammalu naliusunut killissaliussanik aalajangersaanissaq siunertaralugu misissuineq aallartinneqarpoq.

3.3. Siunnersuutip atuuffia, aamma aatsitassanut ikummatissanullu inatsimmut tunngasuuffigisaq

Aatsitassanut ikummatissanullu inatsimmi kapitali 8 malillugu annikitsunik aatsitassarsiornermik suliniutinut, imaluunniit aatsitassanut ikummatissanullu inatsimmi kapitali 11 malillugu akuersissummik pigisaqarani aatsitassanik katersuillunilu pīaanermut siunnersuut atuutinngilaq. Tamatumunnga pissutaavoq, aatsitassanut ikummatissanullu inatsisit naapertorlugu annikitsumik aatsitassarsiornermi ujaasisoqarsinnaannginnera aatsitassanillu radioaktiviunuk pīaasoqarsinnaannginnera. Tassunga ilaliullugu akuersissummik pigisaqarani aatsitassanik radioaktiviunuk katersuisoqarlunilu pīaasoqarsinnaanngilaq, takuuk aatsitassanut ikummatissanullu inatsimmi kapitali 11. Siuliani imm. 2.2-mi tamanna pillugu erseqqinnerusumik paasiniaagit.

Tamakku saniatigut siunnersuutip matuma atuuffigisassaaniippat misissueqqaarnerit. Annikitsumik aatsitassarsiornermik suliniutinut misissueqqaarnertut, imaluunniit akuersissummik pigisaqarani katersuillunilu pīaanermut akuersissummik nalunaaruteqartoqartanngimmat aatsitassanut ikummatissanullu inatsisip tamakku pillugit aalajangersagai sulianut tamakkununnga matussusuissuupput.

Suliat siunnersuummi matumani ilaasut aamma aatsitassanut ikummatissanullu inatsimmi inatsisilersugaajuassapput. Taamaalilluni siunnersuut manna aatsitassanut ikummatissanullu inatsimmi aalajangersakkanik atuukkunnaartitsinngilaq. Aamma taamaalilluni siunnersuummi matumani ilaasutut sulianut akuersissutinik pissarsinissaq aatsitassanut ikummatissanullu inatsimmik malittarinnilluni pisinnaavoq. Taamatut tunngaveqartumik assersuutigalugu aatsitassanut ikummatissanullu inatsimmi aalajangersakkat malillugit akuersissut pillugu qinnuteqaatip itigartitsissutiginnera nalunaarutigineqarsinnaavoq, naak siunnersuummut matumunnga suliniut aalajangersimasoq akerliusuunngikkaluartoq.

Siunnersuut piviusutut pisuni aatsitassanut ikummatissanullu inatsisaata aallaavigisaanik sanioqqutsisinnaavoq. Ujaasinissamut akuersissummik pisinnaatitsissummik piginnittup aatsitassanik pīagassanik takussutissiillunilu killiliisimasoq, aammalu akuersissummi atugassarisanik naapertuutsisimasoq pīaanissamut akuersissutip nalunaarutiginnissaanut pisussaaffeqartuusooq aatsitassanut ikummatissanullu inatsimmi § 29, imm. 2 atuutsitsivoq. Uramik ilaqartumut ujaasinissamut akuersissummik pisinnaatitsissummik piginnittoq siunnersuutip matuma atuutsitaalernerata kingornatigut uranimut pīaanissamut akuersissummik nalunaarutiginnissaminut pisinnaatitaaffeqanngilaq, pisinnaatitsissummik piginnittoq uraneqarfimmik takussutissiillunilu killiliisimagaluarpuunniit. Taamatuttaaq atuuppoq aatsitassanik takussutissiissutit sinnerinut, § 1-imi inerteqqummut akerliujunnartussanut pīaanissamut akuersissummik nalunaaruteqartarneq. Aammattaaq siunnersuummi § 2 malillugu Naalackersuisut aalajangersakkanik

aalajangiiffigisimasinnaasaannut pinngoqqaatinut radioaktiviusunut pigisanut tamanna taamatutaaq atuuppoq.

Allakkut inatsisissatut siunnersuummi §§ 1 aamma 2, taakkunungalu oqaaseqaatit innersuutigineqarput.

Inatsisip aamma atuutilernerani inerteqqummut eqqunneqartumut naapertuutsitsisumik piiannerup pisinnaannginnera paasineqarpat, aatsitassanik misissueqqaarnissamut, misissuinissamut imaluunniit piiannermut akuersissummik sumilluunniit siunnersuutip atuutilernerata kingorna tunniunneqartumik Naalackersuisut killilersuisinnaapput imaluunniit utertitseqqusisinnaallutik. Aatsitassarsiorluni misissuinissamut akuersissutit tunniunneqarnerani uranimik naliusunut killissat akuerisaasut sinnerlugit annertussuseqartumik peqarfeqarnissaa naatsorsuutigineqarani, kisianni aatsitassarsiorluni misissuinerup ingerlanneqarneranut atatillugu taamaattumik peqarfeqartoq paasineqarluni pisoqartillugu, aalajangersagaq ilaatigut naleqquppoq. Piiaanissamut akuersissut tunngavigalugu piiannermut atatillugu naliusunut killissaliussaq qaangerneqarsimappat aalajangersagaq aamma naleqqussinnaasoq takorloorneqarsinnaavoq, kisianni qaangiisimasinnaanerata aatsitassarsiorluni misissuineranut atatillugu paasineqarsimanissaa, nalinginnaasumik ilimagineqartariaqarpoq.

Allakkut inatsisissatut siunnersuummi § 3, tassungalu oqaaseqaatit innersuutigineqarput.

Siunnersuut taarsiissutitalimmik arsaarinnissuteqartarnermut inatsisaanngilaq, taamaattumillu pigisanut aalaakkaasunut pisinnaatitaaffinnik illersugaasunik taarsiissutitalimmik arsaarinnissuteqarnissaq inatsimmi tunngavissalerneqarani. Taamaalilluni ataasiakkaatigut naliliisoqarpat, inatsimmi tunngaviusumi § 73-imi pigisanik aalaakkaasunik illersugaasunik taarsiissutitalimmik arsaarinnissuteqarnertut akuliunnerusoq, akuersissummut itigartitsisoqarsinnaanngilaq imaluunniit akuersissummik annikillilerisoqarsinnaanngilaq imaluunniit akuersissut uterteqqusineqarsinnaanani.

Inatsimmi inerteqqutaasumik unioqquitsinermit akileeqqusisoqarsinnaavoq. Immikkut ittutut inatsisunik sianiginngisanik unioqquitsinerit pineqaatissiissutigisinnaaneri pinerluttulerinermut inatsimmi § 11, imm. 1, 2. pkt.-ikkut malitsigisassaataavoq. Allaat sianiginngisatut inerteqqummik unioqquitsinerit akileeqqusissummik pineqaatissiissutigineqarsinnaanerata tamatuma nassataraa. Tamatumunnga kingunerisinnaasaq ilaatigut tassaavoq siunnersuummi inerteqqussutitut aaqqiissummut naapertuuttumik aatsitassanik uranimik amerlassutsimikkut piiarneqarsinnaanngitsunik, imaluunniit piiarneqarsinnaassanngitsunik imaqarneranik paasisaqarnermi kingornatigut, imaluunniit paasisimasariaqakkaminik suliffeqarfik il.il. misissueqqaarnermik, ujaasinermik imaluunniit piiannermit nangitsissappat akileeqqusissummik pineqaatissinneqassaaq. Tassunga atatillugu suliffeqarfiup aatsitassanut ikummatissanullu inatsit malillugu akuersissummik pissarsisimanera aalajangiisuunngilaq.

Taamaattorli akuerisatut annertussuseqassusissamik qaangiisumik aatsitassap uranimik imaqaarnissaanut suliffeqarfik il.il. naatsorsuutigitinneqarsinnaassanngippat taanna akileeqqusissummik pineqaatissinneqarsinnaassanngilaq.

Allakkut inatsisissatut siunnersuummi § 4, tassungalu oqaaseqaatit innersuutigineqarput.

3.4. Inatsisip atuutilerfissaa immikkut pillugu

Inatsit inatsisip atuutilersussatut saqqummiunneqarnerata kingorna ullup tulliani atuutilissasoq, aammalu inatsisip atuutilernerata kingornatigut tunniunneqarsimasunut akuersissutinut inatsit atuuffeqassasoq siunnersuutigineqarput. Tamanna aamma ujaasinermut akuersissutaareersumut sivitsuilluni piaanissamut akuersissutit nalunaarutiginnissaannut atuuppoq.

Allakkut inatsisissatut siunnersuummi § 5, taakkunungalu oqaaseqaatit innersuutigineqarput.

4. Pisortanut aningaasaqarnikkut allaffissornikkullu kingunerisinnaasat

Siunissami aat-sitassarsiornermik suliniutinik taakkuluunniit ilaannik piviusunngortitsinerit siunnersuutip pinaveerseriaannaavai, tamannalu pisortat aningaasaqarnerannik ineriartortitsinermit sunniisinnaavoq, ilanngullugu siunissami akileraarutigut isertitassanut sunniisinnaalluni.

Suliassat inerteqquteqarnermik aqqissuussinermit sunnerneqartussaappata, pisinnaatitsissummik pigisaqartunut taarsiissutissanik tunniussinissamut imaluunniit allatut taarsiinissamut inatsimmi tungavissamik siunnersuummi aalajangersaasoqanngilaq. Taamaattoq pisinnaatitsissummik pigisaqartut taamaattut allanik tungavilimmik taarsiivigineqarnissaminnut imaluunniit allatut taarsiisoqarnissaanik Namminersorlutik Oqartussat suliassanngortissinnaagaat, mattunneqarsinnaanngilaq.

5. Inuussutissarsiorfimmuut aningaasaqarnikkut allaffissornikkullu kingunerisinnaasat

Siunnersuut inuussutissarsiorfimmuut kalluarneqartussanut aningaasaqarnikkut allaffissornikkullu nammagassaqaqarnerulerannik malitseqassaaq. Ilaatigut pisinnaatitsissummik pigisaqartut Naalakkersuisunut ingerlaavartumik nalunaarusiornissamut atugassanik uranimik misissuisarnissaat, siunnersuutip kingunerisaanik akuersissummut atugassarititaasuni nalinginnaasuni piunasaqaateqartoqartussaavoq .

6. Avatangiisinut aamma pinngortitamut tunngasutut kingunerisinnaasat

Siunnersuut Kalaallit Nunaata avatangiisaanut aamma pinngortitartaanut iluaqutaasinnaassasutut nalilersuutigineqarpoq, siunnersuummut siunertaq tassaammat, imatut annertussusilinnik avatangiisinut aamma pinngortitamut tunngasutut killup tungaanut kingunerisinnaasanut aarleqqutinik nassataqartitsisunik nunamit uranimik piiasoqarnerup pinaveersinnissaa.

7. Innuttaasunut allaffissornikkut kingunerisinnaasat

Siunnersuut inuussutissarsiornermut tunngasutut suliaqarnermut pingaarnertut tunngatitaavoq, uranimullu tunngasutut aatsitassarsiornermut akuersissutit pissarsiarinissaanut periarfissaa-sunik inatsisilersuivoq. Taamaattumik aallaaviatigut siunnersuut innuttaasunut kingunerisassaqaassanngilaq.

8. Pisortaqarfinnik kattuffinnillu tusarniaanerit

Siunnersuut piffissami ulloq 2. juli 2021 aallartilluni ulloq 2. august 2021 tikillugu Naalakkersuisut tusarniaanermut nittartagaanni www.naalakkersuisut.gl-imi tamanut saqqummersinneqarpoq.

Siunnersuut aammattaaq pisortaqarfinni, kattuffinni suliffeqarfinnilu makkunani tusarniaassutaasimavoq:

Asiaq, Avannaata Kommunia, AvataQ, DCE Nationalt Center for Miljø og Energi, GEUS, Greenland Oil Spill Response A/S, Grønlands Domstole, Sulisitsisut, Pinngortitaleriffik, Kalaallit Nunaanni Politiit, ICC Kalaallit Nunaat, Kommune Kujalleq, Kommune Qeqertalik, Kommuneqarfik Sermersooq, Nunatsinni Nakorsaaneqarfik, Nunatta Katersugaasivia, Nuna Advokater, Nunaoil A/S, Nunatsinni Advokatit/Grønlandske Advokater, NUSUKA, Nuummi Ujaqperituut Peqatigiiffiat – Kalaallit Nunaat, Inatsisartut Ombudsmandiat, Qeqqata Kommunia, Rigsombudsmandi, S.I.K., SPS, Telepost A/S, Kalaallit Nunaanni Ilanngaaseriffik, Transparency Greenland, UNESCO-mi aqutsisooqatigiit, Verdensnaturfonden, AVATAQ, Peqatigiiffik URANI NAAMIK Narsaq, Det Økologiske Råd, Vedvarende energi, Nuup Kangerluata Ikinngutai, Narsap aamma Qassiarsuup eqqaanni savaatillit, NOAH Friends of the Earth Denmark, Greenland Ruby A/S, Anglo American Exploration Overseas, Greenland Minerals A/S, Greenland Feldspar Aluminium Resources, Rimbal Pty. Ltd., FBC Mining (BA) Limited, Greenland Vanadium Energy Resources ApS, Disko Exploration Ltd., Nalunaq A/S, CGRG Ltd., Skaergaard Mining A/S, North American Nickel Inc., Orano Mining, Orano Mining, Longland Resources Limited, Graphite Fields Resources Ltd., Obsidian Mining Ltd, Halmares Resources s.r.o, GEFIB s.r.o., Skaergaard Mining A/S, Greenland Silver Moly Resources ApS, Copenhagen Minerals Inc., Dundas Titanium A/S, Greenland Gold s.r.o, Bluejay Mining Plc, Zawar Natural Resources Pvt. Ltd., Resource 500 FeVTi Ltd., White Eagle Resources Limited, White Fox Resources Limited, GREENLAND RESOURCES Inc., Greenfields Exploration Ltd, 21st NORTH ApS, Hudson Greenland A/S, Ironbark A/S, London Mining Greenland A/S, Northground Ltd., Stallion Resources Limited, Challenge Holdings Ltd, Eclipse Metals Limited Greenland, Greenland Anorthosite Mining ApS, Black Angel Mining A/S, Bright Star Resources Limited, Alien Metals Ltd., R500 Greenmin Ltd., TANBREEZ Mining Greenland A/S, Navella AB, De Beers Marine (Pty) Ltd, Zawar Natural Resources Pvt. Ltd. aamma Xploration Services Greenland A/S.

Pisortaqarfinnit, kattuffinnit suliffeqarfinnullu makkunanit tusarniaanermut akissutini Aatsitassanut Naalakkersuisoqarfik tigusaqarsimavoq:

Kalaallit Nunaanni Politimesteri, GEUS, Kommune Kujalleq, Kommune Qeqqata, Kommune Sermersooq, Inuit Circumpolar Council (ICC), Urani Naamik Peqatigiiffik Narsaq, CGRG s.r.o., Greenland Gold s.r.o., Nuna Advokater, Greenland Minerals Ltd., NOAH, Vedvarende Energi, Tanquem JA les Nuclears, Halmares Ressources, GEFIB s.r.o., Australian Conservation Foundation, Hudson Ressources Inc., Ironbark Zinc Ltd., AEX Gold, Transparency International Greenland, Montescola, Orano Mining, Northground s.r.o., Ressource 500 Group, Sulisitsisut (GE) aamma Sulinermik Inuussutissarsiuteqartut Kattuffiat (SIK).

Tusarniaanermut takussutissiaq oqaaseqarfigineqartoq, ilanngussatut ilanngunneqartoq, innersuussutigineqarpoq.

Siunnersuutip aalajangersagaanut ataasiakkaanut oqaaseqaatit

§ 1-imut

Aalajangersakkap imaraa siunnersuutip inerteqqusiinermut aaqqiissutaa. Siunnersuutikkut siunertaq tassaavoq uranimik misissueqqaarnermik, ujaasineramik piiaanermillu sumilluunniit inerteqquteqarnissaq.

Imm. 1-imut

Imm. 1 malillugu uranimik misissueqqaarnek, ujaasineq imaluunniit piiaaneq inerteqqutaavoq. Urani suliniummi pingaarnertut imaluunniit saniatigoorisatut nioqqutissiaagaluarpalluunniit tamanna atuutissaaq.

Urani pinngorfimmigut qaqqat ujaraanni kinnernilu ujaranngortuni nassaassaavoq, taamaattumillu akuersissuteqarfittut sumiiffimmi, imaluunniit akuersissuteqarfittut sumiiffiusinnaasumi uranimik aalajangersimasumik annertussusilimmik tamatigut peqartoqartassaaq. Taamaattumik aatsitassarsiornermik suliniutinik piviusunngortitsineramik uranimik sutigulluunniit piiaanernut piviusumik attueqqusinnigilluinnerneq pinaveersitsissaaq, naak peqqinnissamat, pinngortitamut, avatangiisinut il.il. annertuumik qinngorneqartitaanngitsumik, imaluunniit kingunerisassalinnik sunniuteqarnissanut allanik aarleqqutitaqanngitsumik suliniutip piviusunngortissinnaaneranut uranimik imaqaassuseq ima annikitsigisutut naatsorsuutigineqarsinnaagaluarpat.

Taamaattumik imm. 1-imi inerteqquteqarnermut aaqqiissuussineq, siunnersuummi imm. 2-mut ataqatigiissillugu atuarneqassaaq, taanna malillugu suliasat uranimit allaanerusunut siunnerfeqartinneqartut piviusunngortinneqarnissaat siunertaralugu naliusunut killiliussat inorlugit annertussusilimmik uranimik piiaanissaaq pisariaqarpat aatsitassarsiorfissat inerteqquteqarnermut aaqqiissuussinermi pineqartunut ilaatinneqaratik .

Aalajangersakkami inerteqqummut aaqqiissummut ilaangillat annikitsumik aatsitassarsiorluni suliniutit, aamma akuersissummik peqarani aatsitassanik katersuillunilu piiaanerit, takukkit aatsitassanut ikummatissanullu inatsimmi kapitalit 8 aamma 11. Aatsitassanut ikummatissanullu inatsimmi suliarisanut taakkununga aatsitassat radioaktivusut, ilanngullugu urani pinngitsoortinneqareermata. Tamakku pillugit aamma siulianiittuni imm. 2.2 aamma 3.3 takukkit.

Aalajangersakkami inerteqquteqarnermut aaqqiissuussineq taamatuttaaq ilisimatuussutsikkut misissuineranut aatsitassanut ikummatissanullu inatsimmi § 2, imm. 3-mi aamma 4-mi kiisalu kapitali 12-imi pineqartunut ilaasunut atuutinngilaq.

Inerteqquteqarneq inatsimmi tunngaviusumi § 73-imi pigisanik aalaakkaasunik illersuinermit taarsiissutitalimmik arsaarinnissuteqarnertut akuliunnertut isigineqartariaqarpat, aalajangersakkami inerteqquteqarnermut aaqqissuussineq aammattaaq atuutissanngilaq. Tamanna pillugu imm. 3.3 matuma siulianiittoq takuuk.

Imm. 2-mut

Aalajangersakkami imm. 2-mi siunnersuut tassaavoq agguaqatigiissillugu uranimik imarisaq 0,01 pct.-ip assingatut 100 ppm-imut ataanniissappat, *aammalu* aatsitassaq, uran pinnagu, misissueqqaarneq, ujaasineq piianaanerlu siunertaralugu piiarneqassappat imm. 1-imi inerteqqutip atuutissannginnera.

Imm. 2-mi pinngitsuinermiipput piumasagaatit katersuisut marluk.

Taamaalilluni taamaallaat isumalluummi piiarneqartumi uranimik imarisaq tamakkiisoq akuerisaasutut naleqassutsit killingisa ataanniissappat, *aammalu* uranimut naleqqiullugu aatsitassaq allamut tunngasumik misissueqqaarnermut, ujaasinermit piiaanermullu siunertaqarluni piiarneqassappat aatsitassanik misissueqqaarnerit, ujaasinerit aamma piiaanerit pisinnaapput.

Taamaalilluni qanoq pisoqaraluarpalluunniit uranimik misissueqqaarnermik, misissuinermik imaluunniit piiaanermik siunnerfilimmik pisoqaqqusaanngilaq. Allatut oqaatigalugu uranimik Kalaallit Nunaanneersumik aningaasaqarnikkut iluaquteqartoqaqqusaanngilaq. Urani imm. 2-mi naliusunut killissaliussat akuerisaasut inorlugit annertussuseqaraluarpalluunniit tamanna atuuppoq. Urani taamaalilluni aatsitassani aatsitassanut ikummatissanullu inatsit malillugu akuerisaasuni ilaasuni ilaatinneqarsinnaanngilaq. Tamatuma saniatigut urani pingaarnertut imaluunniit saniatigut tunisassiaassanersoq apeqqutaatinnagu tamanna atuuppoq. Kisiannili aatsitassanik allanik peqarfinnik nassaarniarnissaq siunertaralugu urani sumiissusersiinissamut atorneqarluni, kisianni suliasami urani allatigut siunnerfigineqarani (*aammalu* naliusunut killissaliussatut akuerisaq, takuuk matuma kinguninnguaniittut, qaangerneqarsimatinnagu, taamatut ingerlataqarneq taamaalilluni inerteqquteqarnermi pineqartunut ilaanani) misissuinermit periaatsinik atuisoqarluni pisoqarneri, pineqartunut ilaatinneqanngillat.

Aammattaaq agguaqatigiissitsinermit uranimik akoqarnera naliusunut killissaliussatut akuerisaasumit annertunerusimappat, aatsitassanik allanik misissueqqaarnerit, misissuinerit piiaanerillu ingerlanneqaqqusaanngillat.

Pinngitsuuinissamut aalajangersakkami siunertaavoq urani pinnagu aatsitassanik allanik piiaanissap eqqarsaatiginera, sulianulli atatillugu aatsitassap pinngoqqaarfimmini pileqqaarfigisatut naleqassutsit malitsigisaannik uranimik aalajangersimasumik annertussusilimmik piiasoqarfinni aatsitassarsiornermik suliniutinik periarfissiinissaq.

Aalajangersagaq akuerisatut naleqassutsit killingisaannik ataqtigiissillugu paasineqassaaq. Taamaalilluni akuerisatut naleqassutsit killingisaannik qaangiisumik uranimik agguaqatigiissitatut annertussutsimik isumalluutip tamakkiisutut annertussusia imaqaqqusaanngilaq.

Tamatuminnga naatsorsuineq isumalluummi tamarmiusumi tamakkiisumik uranimik agguaqatigiissillugu imarisaanik tunngaveqarluni pissaaq. Tamatumunnga siunertaq tassaavoq suliniummi suliaqarfinni ataasiakkaani, ilanngullugit qillerinikkut misissugassani assingusuniluunniit akuerisatut naleqassutsit killingat sinnerlugu uranimik peqassappat suliniutip piviusunngortissinnaannginnerata pinaveersinnissaa. Tunngaviusut akuersissuteqarfittut sumiiffiup ilaani assigiinngitsuni aatsitassap katitigaaneramik aalajangerneqartumik uranimik imarisaq assigiinngiaarsinnaavoq, taamaalillunilu akuersissuteqarfittut sumiiffiusumi assigiinngiaartumik annertussusilimmik uraneqartassanera naatsorsuutigisariaqarpoq.

Taamaalilluni aatsitassaammik tamarmiusumik, takussutissiissutaasumik tunngaveqarluni naatsorsuineq pissaaq. Aatsitassaataasumi tamarmiusumi naleqqiussilluni uranimik imarisaq akuerisatut naleqassutsit killingisaanik qaangeeqqusaanngilaq. Suliassaq piviusunngortinneqarpat, piiarneqartut tamarmik isumalluummi pineqartunut ilaatinneqanngillat (taamaattariaqanngilaq), tassami ujaqqat atorineqartussaanningsut, tailings il.il. tassani pineqartunut ilaatinneqanngimmata.

Aatsitassaataasumut erseqqinnerusumik nassuiaassut nalinginnaasumik akilersinnaassutsimik misissuinermiittarpoq. Aatsitassanut ikummatissanullu inatsisip 2019-imi allanngortinnerata kingunerisaanik akilersinnaassutsimik misissuinerit suliarisarnissaat pillugit piumasqaateqartoqartanngilaq, sulili akuersissuteqarfittut sumiiffimmi aatsitassatinik pisinnaatitsissummik piginnittup nalunaarutikkut, qillerinermi misissukkatigut, allatulluunniit ittumik nassuiaanissaa pillugu piumasqaateqartoqarpoq.

Aatsitassanut ikummatissanullu inatsit malillugu aatsitassat takussutissiissutaanerannut atuuttutut najoqqutassat taakku aallaavigalugit aatsitassaammut, taassumalu uranimik imaqarneranut pisinnaatitsissummik piginnittup nassuiaanissaa tunngavigitinneqarpoq. Taamaalilluni aatsitassaamik misissuillunilu nalilersuinermit pisinnaatitsissummik piginnittoq nunat tamalaani akuerisatut periutsinik najoqqutassanillu atugaqassaaq. Aammattaaq aatsitassat pillugit Naalakkersuisunut nalunaarutit suliaralugillu tunniunnissaanni aatsitassarsiornermik suliffissuaqarfimmut nalunaaruteqartarnermut najoqqutassat pitsaasut, nunanilu tamalaani akuerisaasut pisinnaatitsissummik piginnittup atugarissavai.

Nalunaaruteqartarnermut najoqqutassat taama ittut akuttunngitsumik aatsitassanut nalunaaruteqartarnermut najoqqutassat taaneqartarput, taakkulu ilaatigut aatsitassatinik aningaasaliisartunut, aningaasaliisartuusinnaasunut taakkunungalu siunnersuisartunut pisin-

naatitsissummik piginnittup qanoq nalunaaruteqartarnissaa pillugu tamatigoortut aalajangersakkanik aalajangiisuupput. Assersuutigalugit makku atorneqarsinnaapput; Australiami nalunaaruteqartarnermut najoqqutarisaaq "The JORC Code", Canadami nalunaaruteqartarnermut najoqqutarisaaq "National Instrument 43-101 Standards of Disclosure for Mineral Projects", "the CIM Definition Standards on Mineral Resources and Mineral Reserves, the CIM Definition Standards"-mut najoqqutaqartuusoq, Afrikap Kujataani nalunaaruteqartarnermut najoqqutarisaaq "The SAMREC Code" imaluunniit Paneuropami nalunaaruteqartarnermut najoqqutarisaaq "The PERC Reporting Standard". Tassunga atatillugu aatsitassaatinu uranimik tamakkiisumik imaqaassutsip nassuiaaviginissaa assigiissitatut piumasagaataavoq.

Aatsitassarsiornermik suliarisat § 1-imut naapertuuttuuneri qulaani tunngavigisami nalilerneqarnissaat erseqqissumik aallaaviussaaq, tamatumalu qaqtiguunngitsukkut nassatarissavaa naleqaassutsit killingisaata malittarineqarnerat ujaasinerup piviusunngortinnerata ilaani aatsaat paasineqartarnissaa. Taamaattorli suliarisat § 1-imut naapertuuttumik pisinnaannginnerannik pisinnaatitsissummik piginnittuusoq allatut ittumik paasisaqaassappat imaluunniit paasinnittaariaqassappat aatsitassarsiornermik suliarisat nanginnissaat akuerisaassanngillat.

Isumalluutinik taakkunanilu uranimik imaqarnernik pisinnaatitsissummik piginnittut naatsorsuineri pillugit pisortat nakkutilliisarput, aammalu pisariaqassatillugu aalajangiussisinnaallutik imaluunniit inerteqqusiisnaallutik. Tamanna ilaatigut uranimut akuerisatut naleqaassutsimut killingisamik imaluunniit naleqaassutsit killingisaannik pinngoqqaatinut radioaktivusunut allanut siunnersuummi § 2 malillugu aalajangerneqarsimasunik sanioqquutitsiniarnerup pinaveersinnissaa siunertaralugu pivoq. Aalajangiussinermut allaqqaakkanik imaluunniit pisortat teknikkip tungaatigut siunnersuisartuinit inerteqqusiissutit tunngavigalugit pisortat taamatut ittunik aalajangiisnaapput imaluunniit inerteqqutinik atuutsisisnaallutik.

Aatsitassanut ikummatissanullu inatsimmi aalajangersakkat assingusumik atorneqaassanerat erseqqissarneqassaaq, taamaattumillu assersuutigalugu Naalakkersuisunut ilisimatitsinissamut pisussaaffimmik pisinnaatitsissummik piginnittoq peqarpoq. Aamma siunnersuummi § 3 innersuutigineqarpoq, tamatumalu kingornatigut § 1-imut naapertuuttumik piiiaanermik pisinnaasoqannginnera paasineqassappat Naalakkersuisut akuersissummik killiliisnaapput, imaluunniit utertitsisnaapput. Taamaalillutik akuersissutit killilerneqartariaqarneranik imaluunniit utertinneqartariaqarneranik nalilersuinermut attuumassuteqarsinnaasunik pissutsit pillugit Naalakkersuisunut ilisimatitsinissaminnut pisinnaatitsissummik piginnittut aamma pisussaaffeqassapput.

Inerteqqummut aaqqiissutit kingunerisaatut aatsitassarsiornermut atatillugu urani piiarneqarsinnaasimasooq iliuseqarfigineqartariaqassaaq. Tamanna aatsitassanut inatsisaasuni tamatumunnga qaqugukkulluunniit atuuttut malittarisassat najoqqutaralugit pissaq,

ilanngullugit aatsitassanik tulluartumik piiaanissaq pillugu malittarisassiat. Taamaalillutik aatsitassanut ikummatissanullu inatsit malillugu suliniummik aalajangersimasumik akuersissutip pissarsiarisinnaanera pillugu pisortat aamma Naalackersuisut nalinginnaasumik nalilersuisuussapput, aammalu piiakkani sinneruttut, eqqagassanik isumaginninnerit il.il. isumagineri nalilersuinnermut tassunga manna tikillugu taama ittuutillugit ilaassapput. Taamaalilluni siunnersuut manna malillugu misissueqqaarnernut, ujaasinernut piiaanernullu akuersissutinik nalunaaruteqartoqarsinnaanngilaq. Taamaattumillu naak tamanna siunnersuummi inerteqqummut aaqqiissummik tamanna akerliunngikkaluartoq aatsitassanut ikummatissanullu inatsit malillugu suliniutip akuersissutiginerata pissarsiarineqarsinnaanera naatsorsuutiginnarneqarsinnaanngilaq. Avatangiisinut tunngasumik isumannaatsumik uranip eqqagassatut piiarsimasap isumaginissaanik isumaliutigisaaq pisinnaassanngippat piiaanissamut akuersissut pillugu qinnuteqaammik aatsitassanut ikummatissanullu inatsit malillugu itigartitsissuteqarneq nalunaarutigineqarsinnaassaaq. Urani § 1, imm. 2-mi naliusunut killissaliussaq taaneqartoq inorlugu akoqaraluarpuunniit, tamanna aamma atuutissaaq.

§ 2-mut

§ 1-imi inerteqqutaasoq pinngoqqaatinut radioaktiviusunut allanut aamma atuutissanera pillugu aalajangersakkanik Naalackersuisut aalajangiinissamut piginnaaffilerneqassat aalajangersakkami siunnersuutigineqarpoq, soorlulusooq pinngoqqaatinut radioaktiviusunut taama ittunut akuerisatut naleqassutsit killingisassaannik taakkuninnga aalajangiinissaminnut Naalackersuisut piginnaaffilerneqassallutik.

Taamaalisukkut Thoriumimut inerteqqutaasinnaasup eqqunneqarnissaa, aammalu naleqassutsip killingisaanik aalajangersaanissaq siunertaralugu misissuinnermik aallarniisoqassaaq.

Aalajangersakkanik eqqussinissaminnut Naalackersuisut piginnaaffilernissaat siunnersuutigineqarpoq, tamatuma kingornatigut uranimut naleqqiullugu pinngoqqaatinut radioaktiviusunut allanut § 1-imi inerteqqutaasoq atuutsinneqalerluni.

Aalajangersakkap nassatarisaanik aalajangersaavigineqartunik pinngoqqaatinut radioaktiviusunut allanut inerteqqusiineq tamanna pillugu nalunaarutip atuutsilernerani piffissamit tassannga siusinnerpaamik sunniuteqarsinnaalissaaq. Taamaalillutik pinngoqqaatinut radioaktiviusunut allanut siunissami inerteqqusiissutit akuersissutaareersunut sunniuteqassanngillat.

§ 1-imi inerteqqut pinngoqqaatinut radioaktiviusunut allanut attaveqarfiusup ilaatinnissaa atorneqalissappat pinngoqqaatinut radioaktiviusunut allanut akuerisatut naleqassutsit

killingsaassaannik aalajangiinissamut Naalakkersuisut piginnaaffilerneqassasut siunnersuutigineqarpoq.

Taamaalilluni siunnersuummi § 1, imm. 2-mi akuerisatut naleqassutsit killingsaat taamaallaat uranimut tunngasuuvoq, siunnersuummilu ilaalerumaartussanut pinngoqqaatinut radioaktiviusunut allanut naleqquttuusariaqanngilaq.

Aammattaaq pinngoqqaatinik radioaktiviusunik pineqartunik taakkuningga misissueqqaarnermut, ujaasinermit imaluunniit piianermut akuersissutinik killilersuinernik aamma utertitsinernik Naalakkersuisut malittarisassianik aalajangiisinnaapput.

§ 3-mut

Aalajangersagaq aqutigalugu aatsitassanut ikummatissanullu inatsit malillugu misissueqqaarnermut, ujaasinermit aamma piianermut akuersissutinik utertitsinissamut imaluunniit allanngortitsinissamut Naalakkersuisunut toqqammavigisassaq siunnersuutigineqarpoq, tassalu siunnersuummi § 1-imut naapertuuttumik akuersissummi suliarisat isumagineqanngippata, imaluunniit isumagineqarsinnaanngippata.

Taamaalillutik akuerisatut naleqassutsit killingsaat qaangerlugu uranimik ataatsikkut piiaasoqartinnagu aatsitassanik kingusinnerusukkut piiaasoqartoqarsinnaanngitsoq nalilerneqassappat akuersissut tamarmiutillugu akuersissutip allanngortinnissaa, imaluunniit utertinneqarnissaa pillugit Naalakkersuisut aalajangiisinnaapput.

Aalajangersagaq malillugu akuersissummik utertitsinissamut imaluunniit killilersuinissamut aqutissaq taamaallaat pisuni siunnersuummi § 1-imik naapertuisitsisumik misissueqqaarneq, ujaasineq piiaanerlu pisinnaassanngippata taamaallaat atorneqassaaq.

Pisinnaatitsissummik pigisaqartut, taakkua suliaqarnerannut atatillugu aammalu uranimik peqarfeqartoq pasitsaassinerminni imaluunniit paasisaqarnerminni, aatsitassarsiorluni ingerlatassat inatsisit malillugit ingerlaannarsinnaanersut nalornilersimagunik, tamatuma paasinarsinissaa siunertaralugu Aatsitassanut Naalakkersuisoqarfimmut saaffiginnissinnaapput. Taamaattoq isumalluutip erseqqinnerusumik misissorneqareernerani aatsaat, nalinginnaasumik Naalakkersuisoqarfik suliassami aatsitassarsiorluni ingerlatassat inatsisinut naapertuunnerat pillugu inaarutaasumik oqaaseqarsinnaassaaq. Peqatigisaanik oqaatigineqassaaq, ingerlaavartumik nalunaarusiornernut pisinnaatitsissummik pigisaqartut ullumikkut Aatsitassanut Naalakkersuisoqarfimmut nassiuttariigaannut atugassatut uranimut misissuinerit pillugit piumasaqaateqartoqartussaamat, tamannalu tunngavigalugu uranimik akoqarnera tamatumunnga pissutissaqalersitsisimappat, Naalakkersuisoqarfiup pisinnaatitsissummik pigisaqartut ingerlaavartumik oqaloqatigineqartarnissaat aallarnereersimassallugu.

Siunnersuut tamakkiisuulluni akuersissutitut siunnersuutip atuutilernerata kingorna tunniunneqartunut atuuppoq, takuuk § 5. Uranimik il.il. misissuisarnissaq pillugu piumasaqaat taaneqartoq tamanna pissutigalugu aamma akuersissutitut atuutereersunut atuutinnigilaq. Kisiannili siunnersuut akuersissutitut siunnersuutip atuutilerfiata ulluata kingorna tunniunneqartunut tamaginnut atuuppoq, ilanngullugit piiaanissamut akuersissutit aatsitassarsiorluni misissuinissamut akuersissutitut atuutereersunut nangissutigalugu tunniunneqartut. Taamaattumik aamma uranimik il.il. pisariaqartumik misissuisarnissaq, siunnersuutip atuutilereernerata kingorna piiaanissamut akuersissutitut tunniussinernut tunngavissaatinneqassasoq aamma naatsorsuutigineqartariaqarpoq, aamma aatsitassarsiorluni misissuinissamut akuersissutitut siunnersuutip atuutilinninnerani tunniunneqarsimalluni pisoqarnerini.

Akuersissutit, nalinginnartut atugassarisanit il.il. utertitsinissat imaluunniit killilersuinissat pillugit aalajangersakkanik Naalakkersuisut aalajangiisinnaassusaannik aalajangersagaq allannguuteqartitsinnigilaq, soorlulusooq tamanna pillugu aqutsinermut inatsisitigut malittarisassiat nalinginnaasut tamakku naapertorlugit pisinnaassatillugu Naalakkersuisut akuersissutitut utertitsillutilluunniit killilersuininnaassallutik.

Pisariaqartumut naleqqiullugu aalajangersakkat malillugit akuliunnerusunik Naalakkersuisut aalajangiisassanninnerat tunngavigisinnegarpoq. Assersuutigalugu siunnersuummi § 1 akuersissuteqarfittut sumiiffiup annikillisinertigut, imaluunniit akuersissuummi aatsitassanik aalajangersimasunik pinngitsuuisitsinikkut akuerineqarsinnaassappat akuersissutitut utertinnissaa aallaaviatigut pisinnaasariaqannigilaq.

Siunnersuut taarsiissutitalimmik arsaarinnissuteqartarnernut inatsisaanngilaq, taamaattumillu annikillilerineq imaluunniit utertitseqqusineq tunngaviusumik inatsimmi § 73-imi pigisanik aalaakkaasunik illersuinermit taarsiissutitalimmik arsaarinnissuteqarnertut akuliunnertut isigineqartariaqarpat, aalajangersagaq atuutissanngilaq. Tamanna pillugu aamma takuuk imm. 3.3 matuma siulianiittoq.

Akuersissutitut utertinneqartunut imaluunniit killiligaasunut pisinnaatitsissuummik piginnittunut taassiissuteqarnissat pillugit aalajangersakkanik aalajangiisoqannigilaq. Taamaalilluni akuersissutitut annaasanut imaluunniit killilersimasanut pisinnaatitsissuummik piginnittunut taarsiissuteqarnissamut siunnersuummi tunngavissaqartoqannigilaq.

§ 4-mut

Siunnersuummi aalajangersakkanik unioqquitsinermut pineqaatissiissutitut aalajangersagaq tunngavoq.

Aalajangersagaq malillugu uranimik ilaqartumik aatsitassarsiornermut sunulluunniit atatillugu, ilanngullugu akuerisatut pileqqaarfigisani naleqassutsinik taakkuninnga qaangiisunik uraneqartunut atatillugu pineqaatissiisoqarneq ajorpoq. Aatsitassarsiornermit

suliaqartoqarsinnaavoq, soorlu ujaasinerup nalaani ujaqqanut atorneqartussaannngitsunut misissugassanut imaluunniit qillerilluni misissugassanut atatillugu, immikkut isigisatut akuerisatut naleqassutsit killigisaannik qaangiisunik uranimik paaasoqarluni, suliniulli ataatsimut isigalugu inerteqqummut aaqqiissummik naapertuutsisisumik naammassineqarsinnaanera naatsorsuutigineqartuassalluni. Taamaalilluni siunnersuummi § 1, imm. 2-mi suliarineqartutut uranip annertussusaanik naatsorsuineranut tassunga ataqatigiissillugu pineqaatissiisarnermut aalajangersagaq isigineqassaaq.

Tamatumunnga oqaatigineqassaaq aatsitassanut ikummatissanullu inatsit malillugu pisin-naatitsissummik piginnittut ilisimatitsinissamut pisussaaffeqarnerat, aammalu uraneqarnerata paasineqarnerani tamanna tamatumunnga tunngavigitinneqartuuvoq. Taamaalillutik uranimik pigisaqartoqarneranik suliaqarnerminnut atatillugu, aammalu taamaattoqassaneranik pasillernermikkut imaluunniit paasisaqarnermikkut pisinnaatitsissummik piginnittut aatsitassarsiornermik suliarisat inatsisinik unioqqutitsinani nangeqqissinnaaneri pillugit nangaassuteqalersut tamatuma paasineqarnissaa siunertaralugu oqartussaasunut saaffiginnissinnaapput aamma saaffiginnittariaqarput.

Aammattaaq oqaatigineqarpoq, uranimik akoqarneranik uuttortaanernik ingerlatsisoqartussaassasoq, tamanna ilaatigut aatsitassarsiorluni misissuinissamut akuersissutinik tunniussinermit atugassarititaasuni nalinginnaasuniittussaammat.

Imm. 1-imut

Inatsimmi § 1-imut akerliusumik suliarisat isumaginerinut akileeqqusissutitut ittumik pineqaatissiisoqarsinnaanera aalajangersakkap nassataraa.

Imm. 2-mut

Imm. 1-imik unioqqutitsisut inatsisitigut inuttut naatsorsuussat allallu aamma unioqqutitaqarnermut akileeqquneqarsinnaanerat aalajangersakkami aalajangersarneqarpoq.

Imm. 3-mut

Akileeqqusissutitut pineqaatissiissutit Nunatta Karsianut tussanerat aalajangersakkami aalajangersarneqarpoq.

Imm. 4-mut

§ 2-p nassatarisaanik malittarisassianik atuutsitaalersutigut inerteqqutinik aalajangiussanik unioqqutitsinerni akileeqqusissuteqarnerit pillugit malittarisassianik aalajangiisoqarsinnaasoq aalajangersakkamit malitsigisitaavoq.

§ 5-imut

Aalajangersagaq siunnersuutip atuutisilernissaanut aamma ikaarsaariarfittut aalajangersakkanut tunngavoq.

Imm. 1-imut

Siunnersuutigineqarpoq siunnersuut inatsisip akuerineqareersup atuutilertussatut saqqummiunneqarnerata kingorna ullup tullianiit atuutilissasoq. Tamanna Inatsisartut aamma Naalakkersuisut pillugit Inatsisartut inatsisaanni § 31, imm. 1 malillugu atuuttunut naapertuuppoq, taanna malillugu Inatsisartut inatsisaasa atuutilertussatut saqqummiunneqarneranni ullup unnuallu kingorna ullup unnuallu aallartinnerani atuutilertussaallutik.

Imm. 2-mut

Inatsisip atuutilernerata kingornatigut akuersissutitut siunnersuut taamaallaat atuutsitaassasoq imm. 2-mi siunnersuutigineqarpoq, takuuk imm. 1.

Akuersissutit, nalinginnartut atugassarisat il.il. nalunaarutaareersimasut siunnersuummit sunniivigineqassannginnerat aalajangersakkap nassataraa. Taamaalilluni siunnersuummik matuminnga akuersissuteqarnerup kingornatigut uranimik ilaqartumik ujaasinissamut akuersissut aamma atuutissaaq.

Paarlattuanik siunnersuutip atuutilernerata kingornatigut uranimik ilaqartumik akuersissutinik nutaanik ikaarsaariarnermut aalajangersakkap nassatarisaanik nalunaaruteqartoqarsinnaassanngilaq. Tamanna aamma ujaasinermut akuersissutaareersup sivitsorlugu iluaquteqarnissamut akuersissutaasut nalunaarutiginerannut atuuppoq. Tamatuma kingunerisaanik uranimik il.il. pisariaqartunik misissuisarnissaaq, siunnersuutip atuutilernerata kingorna piiaanissamut akuersissutinik tunniussinermut, tunngavissaatinneqassasoq naatsorsuutigineqartariaqarpoq.

Taamaalilluni siunnersuutip atuutilernerata kingornatigut, aamma siunnersuutip atuutilerera sioqqullugu uranimik ilaqartumik ujaasinissamut akuersissummik peqartunut pisinnaatitsissummik piginnittunut uranimik piiaanissamut akuersissummik nalunaaruteqartoqarsinnaassanngilaq. Maannakkut aatsitassanut ikummatissanullu inatsimmi § 29, imm. 2 malillugu uranimik paasineqartunut piiaanissamut akuersissummik pissarsinissamut pisinnaatitsissummik piginnittut nalinginnaasumik killilimmik pisinnaatitaaffeqaralarpata tamanna atuuttuussaaq.

Ilanngussaq: Oqartussanut kattuffinnullu tusarniaaneq

Inatsisissatut siunnersuummut missingiut piffissami ulloq 2. juli 2021 aallarnerfigalugu ulloq 2. august 2021 tikillugu oqartussanut, kattuffinnut il.il. makkununga tusarniaassutigalugu nassiunneqarsimavoq:

Asiaq, Avannaata Kommunia, AvataQ, DCE Nationalt Center for Miljø og Energi, GEUS, Greenland Oil Spill Response A/S, Kalaallit Nunaanni Eqqartuussiviit, Sulisitsisut, Pinngortitaleriffik, Kalaallit Nunaanni Politiit, ICC Kalaallit Nunaat, Kommune Kujalleq, Kommune Qeqertalik, Kommuneqarfik Sermersooq, Nunatsinni Nakorsaaneqarfik, Nunatta Katersugaasivia, Nuna Advokater, Nunaoil A/S, Nunatsinni Advokatit/Grønlandske Advokater, NUSUKA, Nuummi Ujaqgerituut Peqatigiiffiat – Kalaallit Nunaat, Inatsisartut Ombudsmandiat, Qeqqata Kommunia, Rigsombudsmandi, S.I.K., SPS, Telepost A/S, Kalaallit Nunaanni Ilanngaaseriffik, Transparency Greenland, UNESCO-mi aqutsisooqatigiit, Verdensnaturfonden, AVATAQ, Peqatigiiffik URANI NAAMIK Narsaq, Det Økologiske Råd, Vedvarende energi, Nuup Kangerluata Ikinngutai, Narsap aamma Qassiarsuup eqqaanni savaatillit, NOAH Friends of the Earth Denmark, Greenland Ruby A/S, Anglo American Exploration Overseas, Greenland Minerals A/S, Greenland Feldspar Aluminium Resources, Rimbal Pty. Ltd., FBC Mining (BA) Limited, Greenland Vanadium Energy Resources ApS, Disko Exploration Ltd., Nalunaq A/S, CGRG Ltd., Skaergaard Mining A/S, North American Nickel Inc., Orano Mining, Orano Mining, Longland Resources Limited, Graphite Fields Resources Ltd., Obsidian Mining Ltd, Halmare Resources s.r.o, GEFIB s.r.o., Skaergaard Mining A/S, Greenland Silver Moly Resources ApS, Copenhagen Minerals Inc., Dundas Titanium A/S, Greenland Gold s.r.o, Bluejay Mining Plc, Zawar Natural Resources Pvt. Ltd., Resource 500 FeVTi Ltd., White Eagle Resources Limited, White Fox Resources Limited, GREENLAND RESOURCES Inc., Greenfields Exploration Ltd, 21st NORTH ApS, Hudson Greenland A/S, Ironbark A/S, London Mining Greenland A/S, Northground Ltd., Stallion Resources Limited, Challenge Holdings Ltd, Eclipse Metals Limited Greenland, Greenland Anorthosite Mining ApS, Black Angel Mining A/S, Bright Star Resources Limited, Alien Metals Ltd., R500 Greenmin Ltd., TANBREEZ Mining Greenland A/S, Navella AB, De Beers Marine (Pty) Ltd, Zawar Natural Resources Pvt. Ltd. og Xploration Services Greenland A/S.

Aatsitassanut Naalakkersuisoqarfik oqartussanit, kattuffinnit suliffeqarfinniillu makkunanga tusarniaanermut akissuteqaammik tigusaqarpoq:

Kalaallit Nunaanni Politimesteri, GEUS, Kommune Kujalleq, Kommune Qeqqata, Kommune Sermersooq, Inuit Circumpolar Council (ICC), Urani Naamik Peqatigiiffik Narsaq, CGRG s.r.o., Greenland Gold s.r.o., Nuna Advokater, Greenland Minerals Ltd., NOAH, Vedvarende Energi, Tanquem JA les Nuclears, Halmare Ressources, GEFIB s.r.o., Australian Conservation Foundation, Hudson Ressources Inc., Ironbark Zinc Ltd., AEX Gold, Transparency International Greenland, Montescola, Orano Mining, Northground s.r.o.,

Ressource 500 Group, Sulisitsisut (GE) aamma Sulinermik Inuussutissarsiuqartut Kattuffiat (SIK).

Matuma kinguliani tusarniaanermut akissuteqaatini tiguneqartuni immikkoortut pingaarnersaat issuarneqarput. Aatsitassanut Naalakkersuisoqarfiup tusarniaanermut akissuteqaammut oqaaseqaatai uingasumik allassimapput.

Kattuffiit il.il. arlallit uranimik misissueqqaarnissamut, misissuinissamut aamma piiaanissamut inerteqquteqarnermik atuutsitsilernissaq taperserpaat. Inuit Circumpolar Council (ICC), Urani Naamik Peqatigiiffik Narsaq, NOAH, Vedvarende Energi og Tanquem JA les Nuclears, Australian Coservation Foundation, Montescola aamma Kommune Sermersooq taamaalilluni taamaaliorput. Peqatigisaanik kattuffiit il.il. arlallit siunnersuummut akerliupput imaluunniit isornartorsiullutik oqaaseqaatinik imaluunniit apeqqutinik arlalinnik saqqummiillutik, kattuffiit il.il. aalajangersimasut teknikkiunerusunut oqaaseqaatinik nassiussiinnarlutik.

Ingerlatseqatigiiffik GEFIB s.r.o. apeqquteqarpoq siunnersuummi nunap sannaani aatsitassarsiorluni misissuinernik ingerlataqarnerit tamarmik unitsinneqarnissaat siunertaavinnersoq.

Naalakkersuisut aatsitassarsiorluni ingerlatassanut tapersersuipput aammalu siunissami aatsitassanut suliassaqaarfik innuttaasunut tamaginnut iluaqutaasumik Kalaallit Nunaata aningaasaqarnerani annertunerusumi ilaalissasoq takorluugaqarlutik. Kalaallit Nunaanni uranimik piiaasoqassanngitsoq imaluunniit uranimik Kalaallit Nunaanni piiarneqartumik tuniniaasoqassanngitsoq pillugu Naalakkersuisut tunngaviusumik aalajangiinerisa piviusunngortinnissaa, siunnersuummi taamaallaat siunertaavoq.

Sulisitsisut, Nuna Advokater, Ressource 500 Group aamma Halmares Ressources kiisalu ingerlatseqatigiiffiit Ironbark Zinc Ltd., Greenland Minerals Ltd. aamma CGRG s.r.o. oqaatigaat siunnersuut aatsitassarsiornermut suliffissuarni nalornilersitsisoq aammalu aningaasaleerusussuseqannginnerulersitsisoq.

Inerteqquteqarnissap siunnersuutigineqartup aatsitassarsiorluni suliffissuarni aningaasaliinerit aalajangersimasut ajornarsisittussaagai Naalakkersuisut akueraat, tassami maannakkut uranimut imaluunniit 100 ppm sinnerlugu uranimik akulinnut siunnerfilimmik aatsitassarsiorfissanut akuersissummik pissarsisoqarsinnaajunnaarmat. Peqatigisaanik Naalakkersuisut aatsitassarsiorluni ingerlatassanut tapersersuipput aammalu siunissami aatsitassanut suliassaqaarfik innuttaasunut tamaginnut iluaqutaasumik Kalaallit Nunaata aningaasaqarnerani annertunerusumi ilaalissasoq takorluugaqarlutik. Taamaattumik taakkua aatsitassanut ikummatissanullu inatsimmut siunnersuummullu matumunnga naapertuuppata, aatsitassarsiorluni suliffissuarni aningaasaliisarnerit ingerlaannarnissaat Naalakkersuisut tikilluaqqaat. Siunissami aatsitassanut suliassaqaarfik innuttaasunut tamaginnut

iluaqutaasumik Kalaallit Nunaata aningaasaqarnerani annertunerusumi ilaalissasoq Naalakkersuisut suli takorluugaqarput. Siunnersuutip aatsitassarsiorfissat qanittumi pisussat aalajangersimasut akornusersinnaagai Naalakkersuisut akueraat, kisianni pinngoqqaatinut qinngornernik ulorianartunik akulinnut suliassaqarfimmut akisussaassusilimmik politikkeqarneq siunissami inuiaqatigiinnut iluaqutaassasoq qularutiginnigilluinnarlugu.

Sulisitsisut oqaatigaat urani pinngoqqaatinut allaniit avatangiisinut mingutsitsinerusanngitsoq, aammalu assersuutigalugu aqerloq aamma fluor avatangiisinut tunngatillugu iliuseqarfigiuminaannerunerat. Sulisitsisut tassunga atatillugu siunnersuutigaat siunnersuummi pinngoqqaatinut aalajangersimasunut piunasaqaatinik aalajangersaasoqassanngitsoq, kisiannili isumannaallisaaneq, peqqinnissaq, avatangiisit isumalluutinillu atorluaaneq kiisalu inuiaqatigiinni piujuartitsinissaq annertunerusumik ukkatarineqassasut. Sulisitsisut tassunga atatillugu isumalioqatigiissitamik imaluunniit ataatsimiititaliamik pilersitsinissaq siunnersuutigaat.

Kalaallit Nunaanni uranimik piiaanissamik unitsitsinissaq Naalakkersuisut politikikkut kissaatigaat. Taamaattumik Aatsitassanut Naalakkersuisoqarfik isumaqarpoq tamatumunnga maleruagassanik erseqqarissunik aalajangersaanissaq pissusissamisoornerpaasussaasoq. Isumannaallisaaneq, peqqinnissaq, avatangiisit isumalluutinillu atorluaaneq il.il. pillugit maleruagassanik aalajangersaanissaq siunnersuummi matumani siunnerfigineqanngilaq, tassami mianerisassat taakkua aatsitassanut ikummatissanullu inatsimmi suli atuuttumi aammalu ingerlatassanut siunnersuummi matumani pineqartunut ilaasunut atuuttumi, isumagineqarmata. Aatsitassarsiorluni ingerlatassat mianerisassanut taakkununnga naapertuuttumik pisinnaanissaat qulakkeerniarlugu, akuersissutinik tunniussinissaq sioqqullugu aatsitassanut oqartussat suli siunnersortinit avataaneersunit isumasioqateqartassapput. Tamanna aamma assersuutigalugu aqerlunik aamma fluorinik passussinermut tunngatillugu atuuppoq.

Ingerlatseqatigiiffiit Greenland Minerals Ltd.-p aamma CGRG s.r.o.-p siunnersuutigaat 100 ppm-init qaffasinnerusumik naliusunut killissat aalajangersarneqassasut.

Naliusunut killissaliussat 100 ppm-imut aalajangersarnissaat politikikkut toqqarneqarpoq. Tamanna mianerisassanik akerleriittunik assigiinngitsunik oqimaaqatigiissaarineruvoq, ilanngullugu suliffissuit mianerineqarnissaasa, avatangiisinik, isumannaallisaanermik, innuttaasut kissaataannik il.il. mianerinninnissamut sanilliunneqarnera. Naliusunut killissaliussap 100 ppm-imut aalajangersarneqarnerani Naalakkersuisut isumaqarput aatsitassanut uranimit allaanerusunut siunnerfilimmik annertuumik aatsitassarsiorfimmik ingerlatsisoqarsinnaasoq.

Ingerlatseqatigiiffiit Orano Mining-p aamma Greenland Minerals Ltd.-p oqaatigaat naliusunut killissaliussaq 100 ppm assersuutigalugu kuultisiorluni aamma kanngussassiorluni misissueqqaarnermut misissuinernullu atatillugu sukannerpallaartoq, taakkua sumiiffimmut

aalajangersimasumut naliusunut killissaliussaq qaangerujussuarlugu annertussusilimmik uraneqartumut attuumassuteqarsinnaammata.

Isumalluutit tamarmiusut agguaqatigiissillugu uranimik 100 ppm-imik naliusunut killissaliussatut aalajangersagaasumik annertunerusumik, taamaalillunilu pinngortitami pissusissamisoortumik naliusunit annertunerusumik, akoqarlutik aatsitassarsiorfissat Naalackersuisut kissaatiginngilaat. Isumalluutit uranimik akoqarnerat 100 ppm inorlugu annertussuseqarpat, assersuutigalugu kuultisiorluni kanngussassiorlunilu misissueqqaarneq aamma misissuineq suli ingerlanneqarsinnaassaaq. Assersuutigalugu aatsitassani misissugassani aamma qillerinermi misissugassani immikkoortunik 100 ppm sinnerlugu uraneqarfinnik peqaraluartoq, tamanna aamma atuutissaaq.

Ingerlatseqatigiiffiit Northground s.r.o., GEFIB s.r.o. aamma CGRG s.r.o. isumaqarput Kalaallit Nunaat tamakkerlugu uranimut naliusunut killissaliussaq assigiitsillugu aalajangersaaneq ajornartorsiutitaqartoq, tassami Kalaallit Nunaat annertoourujussuuvog aammalu ujarassiornikkut ilutsit assigiinngitsorpasullutik. CGRG s.r.o. tassunga atatillugu siunnersuuteqarpoq, allatut iliuusissatut ujaqqap suminggaaneerfia apeqqutaatillugu uranimut naliusunut killissaliussat 100 ppm-imit qaffasinnerusumik killissalernerqassasut.

Naliusunut killissaliussap 100 ppm-imut aalajangersarneqarnissaa politikikkut aalajangiineruvoq, tamannalu peqatigisaanik suliffissuarnut atugassarititaavoq ersarissoq paasiuminartorlu. Naliusunut killissaliussap 100 ppm-imut aalajangersarneqarnerani peqatigisaanik uranimik pinngortitami peqarnera nunami sumiiffiit, ujaqqat suunerat il.il. apeqqutaalluni allanngorarsinnaasoq sillimaffigineqarpoq.

Kattuffiit NOAH, Vedvarende Energi aamma Grup de Cientifics i Tècnics per un Futur No Nuclear oqaatigaat, uranimut naliusunut killissaliussaq 100 ppm siunnersuutigineqartoq qaffasippallaartoq aammalu uranimut aamma thorium-imut naliusunut killissaliussaq ataatsimut katillugu 50 ppm-imik annertussusilerneqassasoq siunnersuutigalugu.

Inatsisissatut siunnersuut soqutigisanik mianerisassanillu assigiinngitsunik oqimaaqatigiissaariviuvoq. Naalackersuisut isumaqarput uranimut 100 ppm-imik naliusunut killissaliineq naammattumik appasissuseqartoq aammalu siunnersuutip siunertaata pingaarnerup qulakkeernissanut naliusunut killissaliussaasoq illersorneqarsinnaasoq. Peqatigisaanik annertuumik Kalaallit Nunaanni aatsitassarsiorfimmik ingerlatsiinnarsinnaaneq naliusumut killissaliussami ajornarunnaarsinneqarpoq. Oqaatigineqassaaq thorium-imut naliusunut killissaliisinnaaneq siunertaralugu misissuineramik Naalackersuisut aallartitsiniarmata.

Kattuffiit NOAH, Vedvarende Energi aamma Grup de Cientifics i Tècnics per un Futur No Nuclear, Finlandimi maleruagassat innersuussutigalugit siunnersuutigaat ukiumut uranip

katersorneqartup ataatsimut katillugu annertussusissaanut akuerisaasumut 10 tonsimik killissaliineq atuutsinneqalissasoq.

Aatsitassanut Naalackersuisoqarfik isumaqarpoq siunnersuutip siunertaata qulakkeernissaanut 100 ppm-imik naliusunut killissaliussamik aalajangersaaneq naammattoq. Taamaattoq oqaatigineqarpoq, aatsitassanut ikummatissanullu inatsit malillugu suliassamut akuersissummik tunniussisoqassanersoq (taamaassappallu akuersissut qanoq ilusilersorneqassanersoq) nalilersuineri, isumalluutitip agguaqatigiissillugu uranimik akoqarnera apequtaatinnagu, ataatsimoortuni uranimik passussineq, ilaatinneqartussaasoq.

Kattuffiup Montescolap ilaatigut oqaatigaa naliusunut killissaliussaq 100 ppm taamaallaat ilaatigut peqqinnissamik avatangiisinillu mianerinninnissamik tunngavilersuutitaqartoq, aammalu 100 ppm-imik naliusunik killissaliinerup peqqissutsikkut avatangiisitigullu sunniutigisassaannik erseqqinnerusumik misissuinerit tamatumunnga pisariaqartitsisoqartoq paasinarsisippagu, naliusunut killissaliussap allaffissornikkut appartinneqarsinnaanissaa Aatsitassanut Naalackersuisoqarfiup qulakkeertariaqaraluaraa.

Aatsitassarsiorluni ingerlatassanut atatillugu peqqinnissap avatangiisillu mianerineqarnissaat aatsitassanut ikummatissanullu inatsimmi maleruagassiivigineqarnera ingerlaannarpoq. Suliassaq akuerineqarsinnaanersoq, ilanngullugit peqqissutsikkut avatangiisitigullu mianerisassat, taamaassappallu piumasaqaatit suut atuutsinneqassanersut, aatsitassanut oqartussat, oqartussat teknikkinut siunnersortai isumasioqatigalugit aalajangiisussaapput. Uranimut naliusunut killissaliussatut aalajangersarneqartup 100 ppm-unerani tamanna allanngortinneqanngilaq. Taamaalilluni aamma uranimik 100 ppm inorlugu annertussusilimmik akoqaraluartoq, ilaatigut peqqissutsimut avatangiisinullu mianerisassat tamanna pisussaatippagu, aatsitassanut ikummatissanullu inatsit malillugu suliassamut itigartitsisoqarsinnaavoq.

Neqeroortitsineq tunngavigalugu immikkut ilisimasalinnik arlaannaannulluunniit attuumassuteqanngitsunik, siunnersuummi naliusunut killissaliussatut aalajangersakkamut oqaaseqaateqartussanik, nunani tamalaani ataatsimiititaliamik pilersitsisoqassasoq, ingerlatseqatigiiffiup CGRG s.r.o.-p siunnersuutigaa.

Naliusunut killissaliussap 100 ppm-imut aalajangersarneqarnissaa politikikkut aalajangi-ineruvoq. Naliusunut killissaliussamut aalajangersakkamut tunngaviusut inatsisissatut siunnersuummut nassuiaatini erseqqinnerusumik nassuiarneqarput.

Aatsitassarsiorluni ingerlatassanut naliusunut killissaliussamik aalajangersaasoqarani, tailingsinut inissiivinni pinngoqqaatinut qinngornernik ulorianartunik akulinnut naliusunut killissaliussanik aalajangersaasoqassasoq, Ressource 500 Group siunnersuutigaa.

Pinngoqqaatit qinngornernik ulorianartunik akullit, ilanngullugu urani, tailingsinut inissiivinniit, qanoq akoqartiginissaat, aatsitassanut ikummatissanullu inatsit malillugu qinnuteqaatip suliarineqarnerata ingerlaneranut atatillugu avatangiisinut oqartussat taakkualu teknikkikkut siunnersortaasa nalilersuisarneranni ilaatinneqareerpoq. Siunnersuummut matumunnga nassuiaatini allassimasutut, inissiisarneq aatsitassanut ikummatissanullu inatsimmi taamaalilluni maleruagassiivigineqareerpoq, taamatullu pisoqartarnera ingerlaannassaaq.

Ingerlatseqatigiiffiup Orano Mining-ip siunnersuutigaa, tamanna peqatigisaanik uranimik pīaanissamut pisinnaatitsinngitsoq pillugu uranisiorluni misissueqqaarnissamut aamma misissuinissamut akuersissutini atugassarititaasunik immikkut ittunik atuutsitsilernikkut, uranisiorluni misissueqqaarnissaq aamma misissuinissaq akuerineqassasoq.

Kalaallit Nunaanni uranimik pīaasoqarnissaa Naalakkersuisut kissaatiginngilaat, aammalu siunnersuummi matumani siunertaavoq tamatumunnga maleruagassanik atuutsitsilernissaaq. Orano Miningimiit siunnersuutigineqartutut iliornissaaq oqartussanut imaluunniit suliffissuarnut siunertaqarsorinangilaq, tassami misissueqqaarnerup misissuinerullu pīaanermik kinguneqarnissaa siunertaasariaqanngimmat. Uranimik pīaanissaa akuerisaasussaangimmat, kingusinnerusukkut pīaanissap akuerineqarnissaa periarfissaqarani misissueqqissaartoqassappat misissuisoqassappallu, tamanna nalilinnik maangaannartitseqataasinnaassasoq naliliisoqarpoq.

Ingerlatseqatigiiffiup Greenland Minerals Ltd.-ip tikkuarpaa, uranisiorfissarpiaat aamma urani annikitsuinnarniilluni suliassat allat siunnersuummi immikkoortinneqartariaqaraluartut.

Siunnersuummi taamatorpiaq pisoqartoq Naalakkersuisut isumaqarput. Naalakkersuisut siunertaraat, ilaatigut Kalaallit Nunaanni uranimik pīaasoqassanngitsoq imaluunniit uranimik Kalaallit Nunaanni pīarneqartumik tuniniaasoqassanngitsoq, ilaatigut isumalluutini urani agguaqatigiissillugu akuusoq 100 ppm sinnerlugu annertussuseqartillugu aatsitassarsiorfimmik ingerlatsisoqannginnissaa. Taamaalilluni siunnersuummi § 1, imm. 1-imi suliassat suulluunniit uranimut siunnerfeqartinneqartut inerteqqutigineqarput, siunnersuummi § 1, imm. 2-imi urani "annikinnerusumik" katersuussimalluni (agguaqatigiissillugu 100 ppm inorlugu) takussaalluni suliassat allat ajornartinneqaratik.

GEUS-ip inassutigaa erseqqissarneqassasoq, oqaaseq urani paasineqassasoq pinngoqqaat urani, uranoxide-t akerlianik, soorlu geokemisk-imik misissueqqissaarnerit nalinginnaasumik takutikkaat.

"Urani" isumaqartinneqartoq pinngoqqaat urani, naleqquttumik ersarissoq Aatsitassanut Naalakkersuisoqarfik isumaqarpoq. Tamatumani aamma siunnersuutip ataqatigiinnera malinneqarpoq, ilanngullugu § 2 malillugu "pinngoqqaatit qinngornernik ulorianartunik

akullit allat” uranimit allaanerusut pineqartunut ilaatilerlugit, siunnersuut annertusitinneqarsinnaammat.

Ressource 500 Group-ip siunnersuutigaa saffiugassat qinngornernik ulorianartunik akullit tamarmik siunnersuummi pineqartunut ilaasut, allattorneqassasut.

Urani kisimi maannakkorpiaq inerteqquteqarnermi siunnersuutigineqartumi pineqartunut ilaatinneqarpoq.

GEUS-ip § 1, imm. 2-mut tunngatillugu oqaatigaa, oqaaseq ”agguaqatigiissillugu” GEUS-ip paasinninnera malillugu nassuiarluagaanngitsoq. Aatsitassarsiorluni misissuinerup nalaani uranimik akoqarnera pillugu ilisimasanut misissugassat ataasiakkaat, qillerilluni misissugassat il.il. aallaavigineqartarput. Misissugassat ataqatigiinnit attuumassutilinnit tigusaappata, GEUS malillugu misissugassanit ataasiakkaanit agguaqatigiissitsinermi naliusut aatsaat pingaaruteqartussaapput, aammalu misissugassat ataasiakkaat uranimik akoqarnerat naliusunut killissaliussanit annertunerulluni, kisianni isumalluummi tamarmiusumi piunasaqaatit naammassineqarsimallutik, pisoqarsinnaasarpog. GEUS-ip aamma tassunga atatillugu siunnersuutigaa, ingerlatassat aatsitassanik qinngornernik ulorianartunik akoqanngitsunik aatsitassarsiorluni misissuinerumik suliaqarluni ingerlanneqartut pisinnaatitsissummik pigisaqartup uppersarsinnaassagaa tunngavissaatillugu, ujaqqanut misissugassatut tiguneqartunut aamma qillerilluni misissugassanut tamaginnut uranip 100 ppm-nik annertussuseqarnissanut ilaatitsinngiffiusumik oqaasertaliisoqassasog.

Uranimik agguaqatigiissillugu akoqarnera isumalluut tamarmiusog tunngavigalugu naatsorsorneqassasog, maannakkut siunnersuummi § 1, imm. 2-mi ersarissumik allassimalerpoq, taamatullu qillerilluni misissugassanut ataasiakkaanut il.il. atatillugu uranimik naliusunut killissaliussaq sinnerlugu annertussusilimmik peqarnera suliaassap piviusunngortinneqarnissanut taamaalilluni akornutaanngitsoq, aalajangersakkamut nassuiaatini allassimalerluni. Tamanna aamma tunngavigalugu ujaqqanut misissugassanut aamma qillerilluni misissugassanut naliusunut killissaliussanit ilaatitsinnginnermik atuutsitsilernissaq pisariaqarsorineqanngilaq.

GEUS malillugu § 1, imm. 2-mi oqaaseq ”aatsitassaq” misissueqqaarnermut aammalu siusinnerusukkut misissuinerumut atatillugu atorneqarsinnaanngilaq, tassami aatsitassap akuissusaanik naatsorsuineq ineriartortuartuusarmat.

Aalajangersakkami tassungalu nassuiaatini maannakkut allassimalerpoq, ”isumalluummi” uranip agguaqatigiissillugu akui naliusunut killissaliussat inorlugit annertussuseqassasut aammalu ”aatsitassat piiarneqartut” pineqanngitsut.

Isumalluummi uranip akuissusaa qaqugukkut naatsorsorneqartassanersog piffissamik aalajangersaasoqassasog GEUS-ip siunnersuutigaa. GEUS-ip taamaassanngippat

siunnersuutigaa, akuissusaa allangorpat, tamatuma kingorna naliusunut killissaliusaaq qaangerneqarluni, pisinnaatitsissutip atorunnaarneranik tamanna malitseqassasoq, erseqqissarneqassasoq.

Isumalluummut taassumalu uranimik akoqarneranut nassuiaaneq, malitassat aatsitassanut ikummatissanullu inatsit malillugu peqarfinnik paasinarsisitsinermut atuuttut assingi aallaavigalugit pisassasoq, aalajangersakkamut nassuiaatini naatsorsuutigineqarpoq. Peqatigisaanik nassuiaatini erseqqissarneqarpoq tassunga atatillugu pisinnaatitsissummik pigisaqartup nalunaarusiornermut malitassat pitsaasut aammalu nunani tamalaani akuerisaasut atussagai. Tamatuma saniatigut nassuiaatini erseqqissarneqarpoq, pisinnaatitsissummik pigisaqartut isumalluummik naatsorsuinerat pillugu oqartussat nakkutiginnittussaasut, pisariaqarpallu aalajangiisussaallutik, ilanngullugu oqartussat teknikkinut siunnersortaasa akuutinnersigut. Taamaattumik isumalluutip naatsorsorneqartarnerata annertunerusumik erseqqissarnissaa pisariaqarsorineqanngilaq imaluunniit siunertamut iluaqutaasorineqarani.

Naliusunut killissaliusaaq 100 ppm-imik annertussusilik naammassineqarsimanersoq, suliassap killiffiani siusissumi paasiuminaassinnaasoq Aatsitassanut Naalackersuisoqarfiup eqqumaffigaa akueralugulu. Siunnersuummi § 1, imm. 2 malillugu, suliassap piviusunngortinneqarsinnaanissaanut, isumalluutip tamarmiusup agguaqatigiissillugu uranimik akoqarnera 100 ppm inorlugu annertussuseqartussaavoq. Aalajangersakkamut nassuiaatini allassimasutut, imminut akilersinnaassutsimut misissuineramik suliaqarnermi imaluunniit nalunaarusiami allami aatsaat isumalluutip agguaqatigiissillugu uranimik akoqarnera paasineqarajuppoq. Tamatuma kingorna nassuiaatini allassimasutut, amerlanertigut tamanna tunngavigalugu, taamaattumillu aatsaat taamaalinerani, naliusunut killissaliusaaq naammassineqarsinnaanersoq, nalilersorneqartarpoq. Naliusunut killissaliusaaq naammassineqarsimangitsoq imaluunniit naammassineqarsinnaangitsoq pisinnaatitsissummik pigisaqartumut piffissami siusissumi ersarippat imaluunniit ersarittariaqarsimagaluarpat, misissueqqaarnerup, misissuinerup piiaanerullu ingerlatiinnarneqarnerat taamaakkaluartoq aalajangersakkamik unioqqutitsinerusussaavoq. Isumalluutip uranimik akoqarnera pillugu inaarutaasumik nalunaarusiamik suli suliaqartoqarsimangitsoq innersuussutigalugu pisinnaatitsissummik pigisaqartup inerteqquteqarnermik avaqqutaarisinnaanera, tamatumani pinngitsoortineqassaaq.

GEUS-ip siunnersuutigaa ujaqqanut misissugassanut aamma qillerilluni misissugassanut ilisimatusarnermut naleqarsinnaasunut atatillugu uranimut igitsisussaataitanermik aalajangersaasoqassanngitsoq.

Siunnersuummi igitsisussaataitanermik aalajangersaasoqanngilaq. § 1, imm. 2-mut nassuiaatini oqaatsip "iginneqassaaq" allangortinneqarneratigut uunga "iliuuseqarfigineqassaaq", tamanna erseqqissarneqarpoq. Tamatuma kingorna nassuiaatini allassimalerpoq, uranip iliuuseqarfigineqarnera aatsitassanut inatsisini, tamatumunnga

maleruagassanut, ilanngullugit eqqagassanik passussineq aamma aatsitassanik naapertuuttumik piiaaneq pillugit, atuuttunut naapertuuttumik pissasoq.

Nuna Advokater siunnersuutigaa aatsitassarsiorluni ingerlatassat immikkuullarissut inatsisit malillugit ingerlaannarsinnaanersut paasinarsisinnissaa siunertaralugu oqartussanut saaffiginnissinnaaneq inatsimmut nassuiaatini taaneqartoq erseqqissarneqassasoq aammalu inatsisip oqaasertaanni ilanngullugu allanneqassasoq.

Aatsitassanut Naalackersuisoqarfiup isumaa malillugu aalajangersagaq taamaattoq pisinnaatitaaffinnik imaluunniit pisussaaffinnik pisortat ingerlatsinerannut inatsisini maleruagassat malillugit pisussaariinngitsunik malitseqartussaannngilaq. Aammalu isumalluutip erseqqinnerusumik misissorneqarnera naammassippat, suliassami aatsitassarsiorluni ingerlatassat inatsisunik malinniffiunersut pillugu Naalackersuisut nalinginnaasumik aatsaat inaarutaasumik oqaaseqarsinnaalertussaasut, inatsimmut nassuiaatini erseqqissarneqarpoq. Aammattaaq ingerlaavartumik nalunaarusiornermut pisinnaatitsissummik pigisaqartut ullumikkut Aatsitassanut Naalackersuisoqarfimmut nassiuttusaariigaannut, atugassatut uraninut misissuinissat pillugu piumasqaateqartoqassasoq, aammalu uranimik akoqarnera tamatumunnga pissutissaqalersitsissappat, Naalackersuisoqarfik tamanna tunngavigalugu pisinnaatitsissummik pigisaqartunut ingerlaavartumik oqaloqateqarnissaq aallartissagaat, nassuiaatini ilanngunneqarpoq.

Nuna Advokater allapput pinngoqqaatinik qinngornernik ulorianartunik akulinnik allanik inerteqquteqarneq kiisalu tamatumunnga naliusunut killissaliussat pillugit maleruagassanik aalajangersaanissamut Naalackersuisut piginnaatinneqartariaqanngikkaluartut. Nuna Advokater isumaqarpoq tamanna taamaallaat inatsisip allanngortinneratigut atuutsinneqalersinnaasoq.

Inatsisartunut siunnersuutip saqqummiunneqarnerani siunnersuutip siunertaanut pingaarnermut inatsisiliortut isummertussaapput. Misissuinerit aammalu kingusinnerusukkut ilisimasat takutippassuk, assersuutigalugu avatangiisinik imaluunniit isumannaallisaanernik pissuteqartumik pinngoqqaatinut qinngornernik ulorianartunik akulinnut allanut inerteqquteqarnissaq pisariaqartoq, maleruagassat taamaattut sapinngisamik sukkanerpaamik eqaannerpaamillu aalajangersarneqarsinnaanissaat eqqornerpaasussaasoq Aatsitassanut Naalackersuisoqarfik isumaqarpoq. Taamaattumik siunnersuummi § 1, imm. 1 malillugu inerteqquteqarneq aamma pinngoqqaatinut qinngornernik ulorianartunik akulinnut allanut atuuttoq pillugu aalajangersakkanik Naalackersuisut aalajangersaasinnaasut pillugu siunnersuut saqqummiunneqarpoq.

Pinngoqqaatinik allanik, ilanngullugit aatsitassat qaqutigoortut (Rare Earth Elements), ilanngussinissamut piginnaatitsissutitut aalajangersakkap Naalakkersuisunit atorneqarnissaa isumanerluutigalugu ingerlatseqatigiiffiup CGRG s.r.o.-p oqaatigaa

Piginnaatitsissutitut aalajangersakkami taamaallaat pinngoqqaatit qinngornernik ulorianartunik akullit pineqartunut ilaatinneqarput. Tassunga atatillugu thorium pillugu maleruagassanik aamma aalajangersaasoqassanersoq paasinarsisinnissaa siunertaralugu, misissuineq aallartinneqassaaq.

Kommune Kujallip aamma kattuffiup Montescola-p siunnersuutigaat inatsisissatut siunnersuummi § 1 malillugu inerteqquteqarnermi aamma thorium pineqartunut ilaatinneqartariaqaraluartoq.

Naalakkersuisut maannakkorpiaq taamaallaat uranimut inerteqquteqarnek pillugu siunnersuummik saqqummiussiniarput. Taamaattoq oqaatigineqartutut, thorium-imut maleruagassanik aamma aalajangersaasoqassanersoq, taamaassappallu naliusunut killissaliusaaq akuerisaasoq qanoq ittariaqarnersoq, tamatuma paasinarsisinnissaa siunertaralugu, peqatigisaanik misissuineq aallartinneqassaaq.

Pinngoqqaatinut qinngornernik ulorianartunik akulinnut allanut naliusunut killissaliusaaq atuutsitsisoqalinnginnerani soqutigisaqartut tamarmik, ilanngullugit innuttaasut, akuutinneqarnissaat, paasiuminartitsinissaaq takorlooruminartitsinissarlu Naalakkersuisut qulakkiissagaat, siunnersuummut nassuiaatini allassimasariaqaraluartoq, kattuffiup Transparency International Greenland-ip siunnersuutigaa.

Nalunaarummut missingiusiaasussat pinngoqqaatit qinngornernik ulorianartunik akullit allat pillugit maleruagassanik imaqartut tusarniaassutigalugit nassiunneqassapput, aammalu maleruagassanik taamaattunik suliaqarnermi suliffissuit innuttaasullu akuutinnissaat Naalakkersuisut sulissutigissavaat.

Ingerlatseqatigiiffiit Northground s.r.o, CGRG s.r.o aamma Ironbark Zinc Ltd. oqaatigaat oqartussat siunnersuummi § 3 malillugu akuersissutininik annikillisisinissamut imaluunniit utertitseqqusinissamut pisinnaatitaaffeqarnerat aatsitassarsiorfissanik piviusunngortitsinissamut periarfissanik nalornilersitseqataasoq.

Pisortat ingerlatsinerannut inatsisini nalinginnaasuni maleruagassat malillugit pisuni aalajangersimasuni akuersissut aamma annikillileriffigineqarsinnaavoq imaluunniit uterteqquneqarsinnaalluni. § 1-imi pisariitsumik paasiuminartumillu inerteqquteqarnermut aaqqissuussinermik atuutsitsisoqalerpoq, aammalu pisinnaatitsisummik pigisaqartut inerteqquteqarnek taanna malissinnaanagu pisoqartillugu aatsaat, siunnersuummi § 3 malillugu akuersissut annikillileriffigineqarsinnaavoq imaluunniit uterteqquneqarsinnaalluni. Siunnersuummi § 3-mi taamaalilluni oqartussat siunnersuummi § 1-imi inerteqquteqarnermut

aaqqissuussinermik atuutsisisinnaanissaat qulakkeerneaannarpoq, taamatullu ingerlatassat ingerlatiinnarneqarnerat inerteqquteqarnermik unioqqutitsinerussanersoq pisinnaatitsissummik pigisaqartut paasinarsisissinnaanissaannut iluaqutaasussaalluni.

Nuna Advokater tikkuarpaat, siunnersuummi § 1-imut naapertuuttumik piiaasoqarsinnaanngitsoq pisinnaatitsissummik pigisaqartumut ”paasinarluni imaluunniit paasinartariaqaraluarluni” pisoqartillugu, siunnersuummi § 1-imut nassuiaatit malillugit pisinnaatitsissummik pigisaqartut Naalackersuisunut paasissutissiisussaataaasut. Nuna Advokater tassunga atatillugu allappoq, tamanna pisinnaatitsissummik pigisaqartumut kinaassusersiortumik naliliinissamik pisussaaffiliisoq, taannalu aamma § 3 malillugu Naalackersuisut qaqugukkut akuersissummik utertitseqqusinnaanerannut, imaluunniit § 4 malillugu pisinnaatitsissummik pigisaqartup qaqugukkut pineqaatissinneqarsinnaaneranut tunngatillugu nalornissuteqarnermik malitseqartoq. Nuna Advokater allappoq pineqaatissiinerit kinaassusersiortumik nalilersuinermut ataqatigiissinneqarnerat inatsisitigut isumannaassutsimut tunngatillugu isumanerlunnartoq.

Pissutsit taakkua qaqinneqartut Aatsitassanut Naalackersuisoqarfiup isumaa malillugu nalornissuteqarnissamut imaluunniit inatsisitigut isumannaatsuunissakkut isumanerluuteqarnissamut pissutissaqalersitsinngitsut. Paasissutissiisussaataaneq pillugu oqaaseqaat eqqaaneqartoq pisinnaatitsissummik pigisaqartup aatsitassanut ikummatissanullu inatsit malillugu paasissutissiisussaataaneranut atuutereersumut innersuussiviuvoq. Taamaallit pisinnaatitsissummik pigisaqartup ilumoorluni pissutsit pingaarutillit pillugit Naalackersuisut ilisimatittussaavai. Taamatut pisussaaffeqarnermi siunnersuut manna malinneqartussaannigilaq. Kisiannili Naalackersuisunut pasissutissiisussaataaneq aatsitassanut ikummatissanullu inatsimmi § 86, imm. 3 malillugu pisussaareerpoq. Paasissutissiisussaataanerup taassuma unioqqutinneqarnera aatsitassanut ikummatissanullu inatsimmi § 96, imm. 2 nr. 1 malillugu pineqaatissiivigineqassaaq, taanna malillugu piaaraluni imaluunniit mianersuaalliorujussuarluni paasissutissanik eqqunngitsunik imaluunniit paatsuungatitsisunik tunniussisoq imaluunniit paasissutissanik oqartussat aatsitassanut ikummatissanullu inatsit malillugu piumasarisaannik nipangiussiinnartoq akiliisitsinermik pineqaatissinneqarsinnaavoq. Siunnersuummi § 1-mik unioqqutitsisumik ingerlatassanik suliaqartoqarpat akiliisitsinertut ittumik pineqaatissiinissaq taamaallaat siunnersuummi matumani inatsimmi tunngavissalernerqarpoq. Ingerlatassat inatsisinik unioqqutitsisut piaaraluni imaluunniit mianersuaalliorujussuarluni ingerlanneqarpata, tamanna atuuppoq.

Sulisitsisut allapput siunnersuut pigisanik aalaakkaasunik taarsiinertalimmik arsaarinnissuteqarnermut inatsisitut isikkoqartoq, tassami suliffeqarfiit aatsitassanut ikummatissanullu inatsimmi § 29, imm. 2 malillugu pisinnaatitaaffeqartut, pisinnaatitaaffiinik taakkuninnga arsaarneqartussaammata. Ingerlatseqatigiiffiit Northground s.r.o., CGRG s.r.o. aamma GEFIB s.r.o. kiisalu Nuna Advokater aamma Halmares Ressources allapput, inatsimmi taarsiinissamut periarfissamik aalajangersaasoqanngitsoq. Nuna Advokater

tassunga atatillugu siunnersuuteqarput aatsitassarsiorluni misissuinermt aningaasartuutitut annaaneqartunut aammalu ukiumoortumik pisinnaatitsissummut akiliutitut taarsiisarnermut aaqqissuussineq isumaliutersuutigineqassasoq.

Siunnersuut pigisanik aalaakkaasunik taarsiinertalimmik arsaarinnissuteqarnermt inatsisaanngilaq, taamaattumillu pigisanut pisinnaatitaaffinnik illersugaasunik taarsiinertalimmik arsaarinnissuteqarnissamut inatsimmi tunngavissaanani. Aamma siunnersuut taarsiinertalimmik arsaarinninnermt taarsiissuteqarnissaq pillugu aalajangersakkanik imaqanngilaq. Naalakkersuisut aamma allanik tunngavilimmik taarsiisarnermut aaqqissuussinermik atuutsitsilernissamut pissutissaqarsorinngillat.

Ingerlatseqatigiiffik CGRG s.r.o. allappoq siunnersuutip nunani tamalaani eqqartuussivimmut suliakkiinernik isumaqatigiissitsiniarnernillu kinguneqarnissaa ilimanartoq.

Siunnersuut Kalaallit Nunaanni aatsitassanut ikummatissanullu inatsit malillugu akuersissutitut taamaallaat pingaaruteqalissaaq. Aatsitassanut ikummatissanullu inatsit malillugu akuersissutinik tunniussineq Kalaallit Nunaata aalajangiisinnaatitaaffianiippoq aammalu nunani tamalaani inatsisit naapertorlugit nunani allani eqqartuussivinnut misilinneqartussaananu aammalu isumaqatigiissitsiniarnermik atuutsitsiviunani. Tamatumani aatsitassanut ikummatissanullu inatsimmi § 3, imm. 4 aamma malinneqarpoq, taanna malillugu pissutsit aatsitassanut ikummatissanullu inatsimmi pineqartunut ilaasut taamaallaat eqqartuussivinnut Kalaallit Nunaanni aalajangiisinnaatitaasunut suliakkiunneqarsinnaapput. Aammattaaq aalajangersagaq malillugu aalajangiineq eqqartuussivinnut suliakkiunneqartoq, Kalaallit Nunaanni Eqqartuussivimmut siullertut suliarinnittussamut suliakkiunneqartussaavoq.

Nuna Advokater oqaatigaat siunnersuut akuersissutitut atuutereersunut kingumut qiviarnissamik sunniuteqarsinnaasoq, tassami paaanissaq § 1-imut unioqquitsinerussappat, aatsitassarsiorluni misissuinermt nangissutigalugu paaanissamut akuersissummik tunniussisoqarsinnaanngimmat. Nuna Advokater siunnersuutigaat akuersissutitut atuutereersunut inatsisip sunniutissai pillugit erseqqinnerusumik isumaliutersuuteqartoqassasoq. Ingerlatseqatigiiffik CGRG s.r.o. allappoq inatsit kingumoortumik atuutilertussaasoq. Sulisitsisut allapput Kuannersuit pillugit tamanut ammasumik tusarniaaneq siunnersuut manna malillugu takorluugaannaarpassittoq.

Siunnersuut kingumut qiviarnermik sunniuteqartussaannngilaq aammalu kingumoortumik atuutilertussaananu. Siunnersuut taamaallaat akuersissutitut inatsisip atuutilereernerata kingorna tunniunneqartunut atuuttussaavoq. Tamatuma kingunerisaanik akuersissutit tunniunneqareersut, atugassarititaasut nalinginnaasut il.il. siunnersuummit sunnerneqartussaannngitsut. Aatsitassarsiorluni misissuinissamut akuersissut uranimik ilaqartoq, taamaalilluni siunnersuutip matuma akuerineqarnerata kingorna aamma atuutiinnartussaavoq. Paarlattuanik siunnersuutip atuutilereernerata kingorna

akuersissutininik uranimik ilaqartinneqartunik nutaanik tunniussisoqarsinnaassanngilaq. Tamanna aamma aatsitassarsiorluni misissuinissamut akuersissummut atuutereersumut nangissutigalugu piiaanissamut akuersissummut atuuppoq. Siunnersuutip atuutilereernerata kingorna taamaalilluni aamma pisinnaatitsissummik pigisaqartunut, siunnersuutip atuutilernissaa sioqqullugu uranimik ilaqartinneqartumik aatsitassarsiorluni misissuinissamut akuersissummik peqartunut, uranimik piiaanissamut akuersissummik tunniussisoqarsinnaannginneranik malitseqartussaasoq, Naalackersuisut eqqumaffigaat. Pisinnaatitsissummik pigisaqartut aatsitassanut ikummatissanullu inatsimmi maannakkut atuuttumi § 29, imm. 2 malillugu uraneqarfinnut paasineqartunut piiaanissamut akuersissummik pissarsinissamik nalinginnaasumik piumasagaatitalimmik pisinnaatitaaffeqarnerat apeqqutaatinnaq, tamanna atuuppoq. Piiaanissap uranimit allaanerusunut sammitinneqarnerani, kisianni uranimik akoqarnerata naliusunut killissatut akuerisaasoq qaangersimappallugu, tamanna aamma atuutissaaq.

Aammattaaq oqaatigineqarpoq, Kuannersuit pillugu tusarniaanerup inernera inatsisissatut siunnersuutip suliarineqarnerani soorunami ilaatinneqarsinnaassasoq.

§ 1, imm. 1-imi inerteqquteqarnek aamma pinngoqqaatinut qinngornernik ulorianartunik akulinnut aamma atuutissasoq pillugu Naalackersuisut aalajangersaasinnaalerlugit, siunnersuummi § 2, imm. 1 oqaasertalerneqassasoq, Kalaallit Nunaanni Politimesterip siunnersuutigaa. Politimesterip aammattaaq tikkuarpaa, § 4, imm. 2, suliffeqarfiit akisussaaffeqarnerat pillugu aalajangersakkanik oqaasertaliisarnemit nalinginnaasumit allaanerusoq.

Aalajangersakkat eqqaaneqartut tamatuma kingorna iluarsineqarput, taamaalilluni Kalaallit Nunaanni Politimesterip siunnersuutigisaannut pingaarnertigut naapertuuttumik imaqalerlutik.

Kattuffiup Transparency International Greenland-ip siunnersuutigaa naammagittaalliorsinnaaneq siunnersuummi ilanngullugu allanneqassasoq.

Aatsitassanut ikummatissanullu inatsit akuersissutinut tamaginnut aammalu ingerlatassanut siunnersuummi matumani pineqartunut ilaasunut tapiliussatut atuuppoq, taamaattumik naammagittaalliorsinnaaneq kiisalu eqqartuussivimmi misiliinissamut periarfissaq aatsitassanut ikummatissanullu inatsimmi kapitali 1 malillugu pisussaallutik.

Ingerlatseqatigiiffiup Orano Mining-ip siunnersuutigaa uranimik inerteqquteqarnek assersuutigalugu ukiunik sisamanik atorunnaarfissalerlugu aalajangersarneqassasoq, taanna malillugu inerteqquteqarnek sivitsorneqassanersoq imaluunniit atuuffissaa naassanersoq, isummerfigineqassalluni.

Siunnersuutip atorunnaarfissaanik aalajangersaanissamut pissutissaqartoq Naalakkersuisut isumaqanngillat, tassami Kalaallit Nunaanni uranimik piiaasoqarnissaa Naalakkersuisut kissaatiginngilaat. Naatsorsuutiginnngisamik Naalakkersuisut tamatumunnga isummaminnik allannortitsissagaluarpata, inerteqquteqarnerup atorunnaarsinneqarnissaa pillugu Inatsisartunut siunnersuummik nutaamik Naalakkersuisut saqqummiussisinnaapput.

Ingerlatseqatigiiffiup AEX Gold-ip oqaatigaa siunnersuut aatsitassarsiorluni misissuinissamut pisussaaffinnut isummerfigineqanngitsoq. AEX Gold-ip tamanna ajornartorsiutitaqarsoraa, tassami aatsitassarsiorluni misissuinissamut akuersissummik piginnittut, uranimik akoqarnera pissutigalugu siunnersuut malillugu piiaanissamut akuersissummik piviusunngorsinnaassanngitsut, aatsitassarsiorluni misissuinermit ingerlatassanut aningaasaliinissamut kajumissuseqalertussaannngimmata. AEX Gold-ip tassunga atatillugu siunnersuutigaa aatsitassarsiorluni misissuinissamut akuersissutinut kalluarneqartunut aatsitassarsiorluni misissuinissamut pisussaaffiit 0-mut aalajangersarneqassasut, tamatumalu kingorna aatsitassarsiorluni misissuilluni ingerlatassanut aningaasaliinerusinnaasut aatsitassarsiorluni misissuinermit kontumi akiitsortatut takutinneqassasut. Periarfissatut allatut AEX Gold-ip siunnersuutigaa aatsitassarsiorluni misissuinissamut pisussaaffiit taamaaginnassasut, kisianni tamatumunnga unioqqutitsineq aatsitassarsiorluni misissuinermit ingerlatat uterteqquneqarnerannik malitseqassanngitsoq. AEX Gold-ip tamatuma saniatigut siunnersuutigaa aatsitassarsiorluni misissuinermit kontumi akiitsortat suullunniit ukiunut 3-nut taarsiullugu piffissami killiligaanngitsumi atuutissasut.

Aatsitassarsiorluni misissuinermit pisussaaffiit saneqqunneqarnissaat pillugu immikkut maleruagassanik aalajangersaasoqarnissaanik inatsisissatut siunnersuutip ilaatut siunnersuuteqarnissaq pissutissaqarsorineqanngilaq.

Ingerlatseqatigiiffiup Greenland Gold s.r.o.-p siunnersuummut tunngatillugu allakkiat il.il. tamaasa oqartussanit tigunissaat qinnutigaa, peqatigisaanillu siunnersuutip misissornissaanut tamatumalu oqaaseqarfiginissaanut piffissaqartinneqarnerunissaq qinnutigalugu.

Inatsisissatut siunnersuummut missingiut sapaatit akunnerini sisamani tusarniaaneq piffissalerlugu tamanut ammasumik tusarniaassutigalugu nassiunneqarpoq. Tamanna tusarniaanermut piffissaq naammattumik sivisussuseqartoq naliliisoqarpoq. Ingerlatseqatigiiffiup allakkianik pissarsinissamik qinnuiginninnera aamma allagaatinik takunninnissamik qinnuteqaatitut Aatsitassanut Naalakkersuisoqarfimmit suliarineqassaaq.